

# **1 CORINTHIANS**

## **Tahi Lede a Paul anggi di Nohongo Dabu i Corinth**

### **Di haga modongoohia:**

*Tahi lede a Paul anggi di Nohongo Dabu i Corinth*  
la ne hihi belee agoago gi nia dama a Christ ala  
i Corinth inia haingadaa i di gili di mouli dama  
a Christ. Nia haingadaa ala ne kila aga ilodo di  
nohongo dabu a Paul ne haga duu aga i di gowaa  
deelaa.

I di madagoaa deelaa, gei Corinth nogo hai di  
waahale ni Greece, go di waahale damana o  
Achaia, tenua dela e dagi go digau o Rome. E dele  
humalia gei e gila humalia nadau huihui goloo,  
mo nadau hangaahai e humalia, modi mouli  
huaidu e damanaiee i nadau mehanga, mo nadau  
haga dilinga daumaha e logo.

Gei Paul gu maanadu e logo i di gili nia mee  
ala beenei: tee buni modi mouli huaidu ilodo di  
nohongo dabu, modi huaidu i mehanga taane  
modi ahina, modi hagiaga ilodo tangada,  
modi haganohonoho o di nohongo dabu, nia  
wanga dehuia o di Hagataalunga Dabu, modi  
mouli aga o digau mmade. Paul gu helekai aga i di  
kabemee e donu bolo nia mee aanei le e kila mai  
i lodo di Longo Humalia.

Di mada e 13 e helekai i di aloho dela koia  
e humalia inia wanga dehuia a God anggi ana  
daangada. Holongo deenei di mada dela koia  
e modongoohia humalia i lodo di beebaa deenei.

## **Di hagahonu di beebaa deenei:**

Di haga modongoohia (1.1-9)

Tee buni i lodo di nohongo dabu (1.10–4.21)

Di mouli huaidu mo di mouli o di mada haanau  
(5.1–7.40)

Nia dama a Christ mo di hai daumaha gi nia  
balu god (8.1–11.1)

Di mouli o di nohongo dabu mo di hai daumaha  
(11.2–14.40)

Di mouli aga o Christ mo di mouli aga o digau  
hagadonu (15.1-58)

Tigidaumaha ang gi nia dama a Christ i Judea  
(16.1-4)

Nia mee mai i Paul modi hagaodi o di lede  
deenei (16.5-24)

<sup>1</sup> Mai baahi o Paul dela ne gahi go God i dono hiihai, belee hai tangada agoago hagau ni Jesus Christ, mo mai baahi tadau duaahina go Sosthenes.

<sup>2</sup> Ang gi di nohongo dabu a God i Corinth, mo ang gi digau huogodoo ala guu gahi belee hai nia dama dabuaahia a God, ala guu hai nia dama ni Mee i di nadau buni anga gi Jesus Christ, mo nia daangada huogodoo ala enoho i nia gowaa huogodoo, ala e daumaha ang gi Jesus Christ, go di nadau Dagi mo tadau Dagi.\*

<sup>3</sup> God tadau Damana mo Jesus Christ tadau Dagi gi dugu adu gi goodou tumaalia modi noho i di aumaalia.

*Nia hagahumalia mai Christ*

---

\* **1.2:** Acts 18.1

<sup>4</sup> Au e danggee ang gi God i nia madagoaa huogodoo i goodou, i Mee dela ne dugu adu gi goodou tumaalia mai i Jesus Christ.

<sup>5</sup> I digodou buni anga gi Christ, goodou gu maluagina inia mee huogodoo, dalia di hai agoago mo di kabemee.

<sup>6</sup> Di haga modongoohia idi hai o Christ gu mau dangihi i godou baahi,

<sup>7</sup> ga hidi mai goodou, gaa kae nia hagahumalia huogodoo mai God, i di godou noho talitali di gila mai tadau Dagi go Jesus Christ.

<sup>8</sup> Go Mee dela edaahi maaloo goodou gaa dae loo gi di hagaodi, bolo gi de gila aga hua dahi huaidu i godou baahi i di Laangi o tadau Dagi Jesus Christ.

<sup>9</sup> Gi hagadagadagagee gi God, go di God manawa dahi dela ne gahi goodou gi buni anga gi dana Dama go Jesus Christ, tadau Dagi.

### *Tee buni i lodo di nohongo dabu*

<sup>10</sup> Idi ingoo o tadau Dagi go Jesus Christ, au e dangi adu hagamahi gi goodou huogodoo, ogu duaahina nei, bolo goodou huogodoo gi buni anga gi telekai e dahi, gi hudee dumaalia gi tee buni gi gila aga i godou baahi, gei gi hagadaubuni i godou mehanga idi hagamaanadu hua edahi mo di hagabaubau e dahi.

<sup>11</sup> Au gu iloo eau mai baahi hunu gau i di hale o Chloe, bolo goodou elagalagamaaloo i godou mehanga.

<sup>12</sup> Au ga helekai adu beenei: Goodou e helekai geegee, tangada e helekai, “Au e daudali a Paul”,

tangada e helekai, “Au e daudali a Apollos”, tangada e helekai, “Au e daudali a Peter”, gei tangada e helekai bolo ia e daudalia a Christ.\*

<sup>13</sup> Christ lagu waewae inia hagabuulinga! Ma go Paul dela ne daudau i di loobuu belee haga mouli goodou? Goodou ne babdais gi di ingoo o Paul?

<sup>14</sup> Au e danggee ang gi God, au digi babdais dagu dangada i goodou, i daha mo Crispus mo Gaius.\*

<sup>15</sup> Tangada emee di helekai ai bolo goodou ne babdais gi dogu ingoo.

<sup>16</sup> (E donu, au gu babdais labelaa Stephanas mo digau o dono hale, gei au digi langahia bolo au gu babdais labelaa dagu dangada i golo.)\*

<sup>17</sup> Christ hagalee ne hagu mai au belee babdais agu daangada. Mee ne hagu mai au belee agoago di Longo Humalia, hagalee belee agoago mai i di kabemee o nia daangada, gi de haga balumee hua di mogobuna di loobuu o Christ.

### *Christ di mogobuna mo di iloo mee o God*

<sup>18</sup> Idimaa, nnelekai o di made o Christ i hongo di loobuu la di mee balumee i baahi digau ala bolo e nngala. Gei ibaahi gidaadou ala bolo e hagamouli, nnelekai aanei la nia mogobuna hua ni God.

<sup>19</sup> Di Beebaa Dabu e helekai boloo, “Au e haguhauidu di iloo mee o digau kabemee, gei Au e dugu gi daha di kabemee o digau ala e iloo nia mee.”\*

---

\* **1.12:** Acts 18.24      \* **1.14:** Acts 18.8; 19.29; Romans 16.23

\* **1.16:** 1-Corinthians 16.15      \* **1.19:** Isaiah 29.14

<sup>20</sup> Malaa, aahee digau kabemee? Be go digau ala gu maalama? Be go digau ala edohu di haga modongoohia aga di iloo di mogobuna o henuailala? God gu haga modongoohia aga bolo di kabemee o henuailala la di balumee hua!\*

<sup>21</sup> Idimaa, mai i dono iloo, God guu hai nia daangada gi deemee di modongoohia Ia mai i nadau iloo donu. God guu hai bolo Ia e haga mouli hua digau ala e hagadonu di Longo Humalia dela e haga balumee go digau huaidu.

<sup>22</sup> Digau o Jew e hiihai e mmada gi nia mogobuna ga hagadonu laa, gei digau o Greece e halahala di kabemee.

<sup>23</sup> Gei gimaadou e agoago hua i di hai o Christ dela ne daudau i di loobuu. Di longo deenei la dela di mee e hagawelewele huoloo ginai digau o Jew, gei digau tuadimee hogi e haga balumee di maa.

<sup>24</sup> Gei i baahi digau ala guu gahi go God, digau o Jew mo digau tuadimee, nia helekai aanei i di hai o Christ la go di mogobuna o God mo di iloo mee a God.

<sup>25</sup> Idimaa, te kabemee a God le koia e kabemee i di iloo tangada, gei di bagege o God le koia e maaloo i nia mahi o tangada.

<sup>26</sup> Ogu duaahina nei, goodou gilangahia godou mouli i di madagoaa a God ne gahi mai goodou: digau hua duii i godou lodo nogo kabemee, be nogo mogobuna, be nogo aamua i di hai o henuailala.

<sup>27</sup> God gu hili aga digau dee kabemee i henuailala, belee hagatee digau kabemee, gei gu hili aga digau paagege i henuailala, belee hagatee digau ala e maaloo.

---

\* **1.20:** Job 12.17; Isaiah 19.12; 33.18; 44.25

28 Gei Mee gu hili aga labelaa digau ala e balumee i di hai o henuailala, mo digau huaidu, mo digau hagaloale, belee hagahuaidu ai digau hagabalagau.

29 Malaa, di mee deenei gu modongoohia bolo ma deai tangada e hagapuu i mua o God ai.

30 Deelaa di mee a God ne hila adu ai gi goodou, bolo goodou e hai nia dama ni aana mai i di godou buni anga gi Jesus Christ. Gei God guu hai a Christ di iloo mee ni gidaadou, gei gidaadou guu donu i mua o God mai i Christ, gei guu hai digau dabu ni God, gei gu dagaloaha.

31 Di Beebaa Dabu e helekai,  
 “Maa iai tangada bolo ia e hagapuu i dahi mee,  
 gi hagapuu i nia mee a Dimaadua ne hai.”\*

## 2

### *Di agoago o Christ dela ne daudau*

1 Ogu ihoo duaahina nei, dogu gila adu gi goodou la ne belee agoago adu nia mee donu a God ala e de iloo nia daangada. Au digi agoago i nia helekai llauehe mo kabemee.

2 Gei dogu madagoaa nogo i godou baahi, au gu hagamaanadu bolo au ga haga de langahia nia mee huogodoo, ga hagamamaanadu hua di hai a Jesus Christ gei e donu go di daudau o Maa i hongo di loobuu.

3 Au ne dau adu gi godou baahi, gei au nogo bagege, nogo bolebole huoloo i dogu madagu,\*

4 gei agu agoago mono helekai la hagalee ne hai idi kabemee mo nnelekai haamanawa,

---

\* 1.31: Jeremiah 9.24      \* 2.3: Acts 18.9

gei ne haiadu idi tonu mai di mogobuna o di Hagataalunga o God.

<sup>5</sup> Godou hagadonu la hagalee ne hidi mai i di kabemee o tangada, gei mai di mahi o God.

### *Di iloo mee a God*

<sup>6</sup> Au e agoago nnelekai o di iloo mee anggi digau ala gu maaloo duai nadau hagataalunga. Di iloo mee deenei la hagalee ni henuailala be nia mogobuna ala e dagi henuailala ala ga hagalee.

<sup>7</sup> Di iloo mee dela e agoago iei au, la go di iloo mee ngala a God dela gu hilihili go Mee i mua henuailala ne hai belee haga madamada ai gidaadou.

<sup>8</sup> Deai dahi dagi o henuailala ne modongoohia di maa ai. Maa nei bolo digaula ne iloo di maa, digaula digi daudaulia di Tagi o di madamada.

<sup>9</sup> Gei di Beebaa Dabu e helekai,  
 “Nia mee ala e de gidee, be digi longono ai,  
 be digi hagamaanadu ina bolo e mee di hai,  
 aalaa nia mee a God ne hagatogomaalia  
 gi digau huogodoo ala e aloho i de Ia.”\*

<sup>10</sup> Mai di Hagataalunga Dabu, God gu hagamodongoohia mai gi gidaadou ana mee huogodoo ala e de iloo gidaadou. Di Hagataalunga le e halahala nia mee huogodoo, mo nia llaala te modongoohia o nnadinga a God.

<sup>11</sup> Ma go di hagataalunga i tatau lodo dela e iloo gidaadou hagatau. Idi ala la hua, go di Hagataalunga hua o God, dela e iloo nia mee huogodoo a God.

---

\* **2.9:** Isaiah 64.4

12 Gidaadou hagalee ne hai mee gi di hagataalunga o henuailala, gei ne hai mee gi di Hagataalunga o God, dela ne hagau mai belee hai gidaadou gi iloo nia mee huogodoo a God ne dugu mai gi gidaadou.

13 Malaa, gimaadou hagalee helekai i nnelekai ne aago go di iloo mee dangada, gei e helekai i nnelekai ne aago go di Hagataalunga, e haga modongoohia nia donu Hagataalunga ala e tau anga gi nnelekai Hagataalunga.

14 Tangada dela dono Hagataalunga ai, e deemee di hai mee gi nia wanga dehuia mai i di Hagataalunga o God, mee e de iloo nia mee aanei, e balumee hua anggi deia, idimaa tahidamee onia maa le e hagamodongoohia hua go di Hagataalunga.

15 Tangada dela dono Hagataalunga i golo, le e mee di hagiaga nia dahidamee onia mee huogodoo, gei deai tangada e mee di hagiaga a mee ai.

16 Di Beebaa Dabu e helekai,  
 “Koai dela e iloo di maanadu o Dimaadua?  
 Koai e mee di aago a Mee?”\*  
 Gei gimaadou gu iloo nia maanadu a Christ.

### 3

#### *Digau hai hegau a God*

1 Ogu ihoo duaahina nei, au digi helekai adu gi goodou be tangada e helekai gi digau guiai nadau Hagataalunga, gei au ne helekai be tangada ne helekai gi digau henuailala, ala e hai be nia dama lligi nadau hagadonu Christ.

---

\* 2.16: Isaiah 40.13



<sup>2</sup> Au ne haangai goodou gi nia milugu, hagalee nia meegai hamaaloo, idimaa goodou digi togomaalia gi nia maa, gei dolomeenei, goodou digi togomaalia hua igolo gi nia maa,\*

<sup>3</sup> idimaa, goodou e mouli hua igolo i di mouli o henuailala. Maga gila aga tubua i godou mehanga, ga hai baahi anggi tangada nei mo tangada nei, nia mee aanei la hagalee haga modongoohia bolo goodou digau ni henuailala, e daudali nia hai o henuailala?

<sup>4</sup> Tangada i goodou ga helekai boloo, “Au e daudali a Paul,” gei tangada igolo e helekai boloo, “Au e daudali a Apollos” malaa, godou hangaahai la go nnangaahai o digau henuailala!\*

<sup>5</sup> Apollos la koai? Paul la koai? Gimaua nia daangada hua hai hegau ni God ala nelaha mai goodou gilodo di hagadonu. Gimaua tei gii hai dana duhongo hegau dela ne gaamai go Tagi bolo gi heia.

<sup>6</sup> Au e haga nonnono agu lii laagau, gei Apollos e haga magalillili nia maa gi nia wai, ma go God dela e haga tomo aga nia laagau.\*

<sup>7</sup> Tangada dela e haga nonnono, be tangada dela e haga magalillili di laagau deela, la hagalee hagabalagau. Tangada e hagabalagau la deela go God, idimaa, go Mee dela e haga tomo aga di laagau.

<sup>8</sup> Tangada dela e haga nonnono mo tangada dela e haga magalillili, la hagalee hai geegee. Gei God gaa hui meemaa gi di hui dela e tau anga gi nau ngalua ala nogo hai.

---

\* **3.2:** Hebrews 5.12-13

\* **3.4:** 1-Corinthians 1.12

\* **3.6:** Acts

18.4-11,24-28

<sup>9</sup> Idimaa, gimaua la tagadau ihoo hai hegau ni God, goodou go di gowaa dogi mee ni God, di hale a God.

<sup>10</sup> Au gu hai hegau gi dogu duhongo hegau dela ne dugu mai go God, gu ngalua iei au gadoo be tangada e iloo di hau hale, ne haga noho di hagamau o di maa. Gei tuai dangada ga haga duu aga dono hale i hongo di hagamau deela. Tangada nei mo tangada nei i goodou gii mmada gi humalia i dana hau di hale.

<sup>11</sup> Idimaa God guulawa di haganoho a Jesus Christ bolo go Mee hua dela go di hagamau, di hagamau e hagadu u aga i golo ai.

<sup>12</sup> Hunu gau ga haga duu aga nadau hale i hongo di hagamau deenei, e hai hegau ginia goolo, be nia silber, be nia hadu hagabalagau. Hunu gau e hai hegau ginia laagau, be nia geinga, be nia lau laagau mae.

<sup>13</sup> Malaa, tahidamee o nnegau digau hau hale ga haga modongoohia aga i di Laangi o Christ, idimaa, i di laangi deela, di ahi e haga modongoohia aga tahidamee nia ngalua o digau hau hale.

<sup>14</sup> Maa nia moomee o digau hau hale la ne hau i hongo di hagamau deenei, la ga hagalee wwele i di ahi deela, digaula e kae nadau hui.

<sup>15</sup> Maa nia moomee o tangada ma gaa wwele, geia gu luudi nia mee huogodoo. Gei mee ga mouli be tangada dela ma ga ulu mai gi daha mo di ahi deela.

<sup>16</sup> Goodou digi iloo bolo goodou la di hale daumaha ni God, gei di Hagataalunga o

God le e noho i godou lodo?!\*

<sup>17</sup> Tangada ma ga oho di hale daumaha o God, gei God ga oho a mee, idimaa, di hale o God le e dabuaahia, malaa ma go goodou ala go di hale daumaha a God.

<sup>18</sup> Hudee halahalau ina goodou. Maa tangada i goodou bolo ia tangada kabemee i henuailala nei, geia gii hai tangada dadaulia, gei dono kabemee la gaa donu.

<sup>19</sup> Idimaa, nia mee ala bolo nia kabemee o henuailala nei, le e balumee i mua o God. Di Beebaa Dabu e helekai, “God ga daahi digau kabemee i lodo nadau balu kabemee.”\*

<sup>20</sup> Di Beebaa Dabu gu helekai labelaa,

“Dimaadua e iloo Ia bolo nia hagamaanadu o digau kabemee la ono hadinga ai.”\*

<sup>21</sup> Deenei laa, hudee hagaamu ina nia mee tangada ala e mee di hai! Nia mee aanei huogodoo la ni goodou:

<sup>22</sup> Paul, Apollos mo Peter, henuailala nei, di mouli mo di made, di madagoaa dolomeenei mo di madagoaa ga dau mai, nia mee aanei huogodoo ni goodou.

<sup>23</sup> Gei goodou nia dama ni Christ, gei Christ ni God.

## 4

### *Digau agoago hagu a Christ*

<sup>1</sup> Goodou duguina gimaadou be digau hai hegau ni Christ, ala e hai mee gi nia agoago nngala a God.

---

\* **3.16:** 1-Corinthians 6.19; 2-Corinthians 6.16      \* **3.19:** Job 5.13

\* **3.20:** Pisalem 94.11

<sup>2</sup> Deenei di mee humalia e hai gii hai go digau hai hegau: digaula e hai gi manawadahi anggi nadau dagi.

<sup>3</sup> Au ede heieau maa goodou be di gowaa hai gabunga ga hagiaga au, gei au hogi hagalee hagiaga au.

<sup>4</sup> Dagu maanadu le emadammaa, gei di mee deenei hagalee hagamodongoohia bolo au ogu huaidu ai, go Dimaadua hua dela e hagiaga au.

<sup>5</sup> Malaa, goodou hudee hagiagina tangada imua di madagoaa donu odi hagiaga. Di madagoaa o Tagi magahanimoi, deela di madagoaa e huge nia mee huogodoo ala e nngala ilodo di bouli, mo di haga modongoohia aga nia hagamaanadu nngala ala ilodo nia daangada. Deela hogi di madagoaa o tangadanei mo tangadanei e kae dono hagaamu mai baahi o God.

<sup>6</sup> Ogu duaahinane, gimaua mo Apollos gu hai hegau i nia mee aanei bolo gi iloo goodou tadinga nia helekai aanei: “Daudalia nnaganoho ala e donu.” Goodou hudee hilihili dangada, bolo ga hagahumalia tangada e dahi, ge e hagahuaidu tangada dela i golo.

<sup>7</sup> Ma koai ne hai goe gi aamua i digau ala i golo? Ma hagalee go God dela ne gowadu gi di goe nia mee huogodoo? Goe e mee di hagapuu gi nia mee ala ne gowadu dehuia behee?

<sup>8</sup> Goodou gu hai mee gi godou mee ala nogo hiihai ginai? Goodou gu maluagina? Goodou guu hai nia king, ma e aha maa gimaadou digi hai nia king? Au bolo goodou gii hai nia king

donu, gii mee labelaa gimaadou di hai nia king dalia goodou!

<sup>9</sup> Au e hagamaanadu bolo God guudugu gimaadou digau agoago hagau gi mugimuli loo, gadoo be digau gu hagahuaidu belee daaligi gii mmade i mua nia daangada, belee hai di mee haga mmada i mua digau di langi mo henuailala huogodoo.

<sup>10</sup> Nia daangada bolo gimaadou digau gu dadaulia idimaa, go Christ, gei goodou digau kabemee ibaahi o Christ! Gimaadou digau paagege, gei goodou e maalo! Gimaadou nia baludaangada hua, gei goodou digau hagalabagau!

<sup>11</sup> Gaadae mai gi dolomeenei, gei gimaadou e hihii gai gei e hieinu, e gahu i nia goloo mahaa-haa, e dadaaligi, madau gowaa e noho gimaadou ai.

<sup>12</sup> Gimaadou engalua hagamahi gi madau lima ge e duadua. Di madagoaa gimaadou maga hagahuaidu, gei gimaadou e hagahumalia digaula. Digaula maga dadaaligi gimaadou, gei gimaadou e hagakono madau manawa.\*

<sup>13</sup> Gimaadou maga hagatee, gei gimaadou e helekai humalia gi digaula. Dangi nei gei gimaadou guu hai gadoo be tagabae geinga dela koia e huaidu i hongo henuailala, mo nia mee huogodoo o nia daangada ala e ginagina ai.

<sup>14</sup> Au e hihi adu nia mee aanei, hagalee bolo e haga langaadia goodou. Au e hiihai hua e aago goodou be agu dama hagaaloho.

---

\* **4.12:** Acts 18.3

<sup>15</sup> Ma e aha maa goodou godou gau madanga-holu mana (10,000) e madamada humalia godou mouli ang gi Christ, di godou damana le e dahi hua. Idimaa ilodo godou mouli buni anga gi Jesus Christ, au guu hai di godou damana i dagu dugu adu di Longo Humalia.

<sup>16</sup> Deeneilaa, au edangiadu gi goodou bolo goodou gi kawe i di au.\*

<sup>17</sup> Idi hadinga deenei, au e hagau adu a Timothy gi godou baahi. Mee go dagu dama haggaloho, gei e manawa dahi gi Christ. Go mee dela ga haga langahia adu gi goodou dogu ala mouli buni anga gi Jesus Christ dela e hai be agu agoago ilodo nia nohongo dabu huogodoo.

<sup>18</sup> Hunu gau i godou baahi guu hai digau hagamua, idimaa goodou gu hagamaanadu bolo au e hagalee gila adu.

<sup>19</sup> Maa Dimaadua ga hiihai, gei au galimalima dogu hanadu, e halahala be ma nia mogobuna aha, ala e hai mee ginai digaula, mo nia helekai digaula ala e helekai ai.

<sup>20</sup> Idimaa, Teenua King o God la hagalee go nnelekai, gei go nia mogobuna maaloo.

<sup>21</sup> Dehee digodou mee dela ehiihai ginai? Au nebelee hanadu gi goodou mo dagu mee daaligi dangada, be hanadu i di hagataalunga o di aloho mo di hila gi lala?

## 5

### *Nnangaahai huaidu i lodo di Nohongo dabu*

---

\* **4.16:** 1-Corinthians 11.1; Philippians 3.17

<sup>1</sup> Di longo e helekai bolo goodou e mouli haihai noo i di godou mouli hiihai mouli be di manu, di hagadilinga mouli dela e hagalee gila aga i baahi nia daangada, ma e aha maa digaula le e noho ilodo di bouli: Taane e kii i baahi di lodo o dono damana!\*

<sup>2</sup> Malaa e hai behee, goodou e mee di hagapuu? Goodou hagalee ne belee lodo huaidu, gei tangada dela e mouli beenei la hagalee ne belee hagabagi gi daha mo goodou, gei hagalee buni ginai?

<sup>3</sup> Ma e aha maa dogu huaidina le e mogowaa loo i goodou, au i godou baahi i di hagataalunga. Au nei bolo e noho hua i godou baahi, au gu hagiaga tangada ne hai di huaidu deela.

<sup>4</sup> Godou madagoaa ala ma ga mmuimmui gi di gowaa e dahi i di ingoo tadau Dagi go Jesus, gei au e madalia goodou i dogu hagataalunga, mai di mogobuna o tadau Dagi go Jesus dela e madalia gidaadou,

<sup>5</sup> goodou wanga ina tangada deenei gi Setan, dono huaidina ga hunahuna gi daha, gii mee dono hagataalunga gi mouli i di Laangi o tadau Dagi.

<sup>6</sup> E hai gee go di godou hagamua. Goodou e iloo telekai boloo, “Nia mee ‘yeast’ dulii loo e mee di hai di haga munga palaawaa gi haga hula.”\*

<sup>7</sup> Dawaa gi daha nia ‘yeast’ pobo o nia huaidu gi madammaa goodou. Goodou gaa hai be di palaawaa hoou ono ‘yeast’ ai, be dagu iloo bolo goodou e madammaa. Idimaa Tagamiami o di Pasoobaa la gu togomaalia, idimaa Christ go tadau dama siibi o di Pasoobaa gu tigidaumaha.\*

---

\* **5.1:** Deuteronomy 22.30

\* **5.6:** Galatians 5.9

\* **5.7:** Exodus

<sup>8</sup> Deeneilaa, gidaadou gaabudu tatau Hagamiami Pasoobaa, hagalee nehahi ginia palaawaa nehagatanga ginia ‘yeast’ pobo, nia ‘yeast’ odi huaidu mo nia haihai milimilia, gei nehahi ginia palaawaa ala digi unugia ginia ‘yeast’, nia palaawaa ala emadammaa gei edonu.\*

<sup>9</sup> Ilo do daga lede dela ne hihi adu gi goodou, au ne helekai bolo gi hudee hai hoo gi digau hai mee huaidu.

<sup>10</sup> Au hagalee helekai i digau bouli ala e haihai nia mee huaidu, hagagailaa, gaiaa, be daumaha anggi nia balu god. Maa goodou e hiihai e hagapaa gi daha mo digaula, goodou e hai loo gi tanga gi daha mo henuailala.

<sup>11</sup> Malaa, dolomeenei, au e helekai i di hai o tangada dela bolo ia tuaahina ni goodou, gei mee e mouli huaidu be di manu, hagagailaa, daumaha anggi nia balu god, kai tilikai, hiigeina tagaao, gaiaa. Goodou hudee buni anga gi mee ge hudee miami i baahi o mee.

<sup>12-13</sup> Ogu donu ai e hagiaga digau ala i tua di nohongo dabu, go God hua dela e hagiaga digaula. Malaa goodou hagalee belee hagiaga digau o di godou nohongo dabu? Be di hai o di Bee-baa Dabu dela e helekai boloo, “Goodou gi hudua gi daha tangada huaidu dela i godou baahi.”\*

## 6

### *Halahala di tonu*

\* **5.8:** Exodus 13.7; Deuteronomy 16.3      \* **5.12-13:** Deuteronomy 13.5; 17.7



<sup>1</sup> Maa tangada bolo ia e halahala ono donu i baahi dono duaahina dama a Christ, e aha dela e hana loo e dau i di gowaa hai gabunga o digau bouli, de ga halahala hua ono donu gi baahi nia dama a God?

<sup>2</sup> Goodou e de iloo bolo nia daangada a God ga hagi aga henuailala? Maa goodou ne belee hagi aga henuailala, malaa goodou hagalee gaa mee di hagi aga nia mee hagalligi?

<sup>3</sup> Goodou e de iloo bolo gidaadou ga hagi aga digau di langi? Ma e hai beenei, gidaadou e mee hua di hagi aga nia mee o di mouli nei.

<sup>4</sup> Maa nia mee beelaa ga kila aga, goodou e mee di wanga nia gabunga aanei e hagamodu go digau ala hagalee dau i lodo di nohongo dabu?!

<sup>5</sup> Haga langaadia dangada! Ma tangada kabemee i godou lodo ai dela e mee di hagahumalia di lagamaaloo mehanga nia dama a Christ?

<sup>6</sup> Gei dolomeenei, tama a Christ e kae dono duaahina gi di gowaa hai gabunga, e gabunga i baahi digau hagalee hagadonu.

<sup>7</sup> Maa goodou ga halahala godou donu i godou mehanga, e haga modongoohia aga bolo di hala i godou mehanga. Ma hagalee e humalia adu gi goodou, maa goodou ga diiagi hua godou donu, ga haga balumee? Ma hagalee e humalia adu gi goodou maa tangada ma ga gaiaa goodou?

<sup>8</sup> Gei deeai, goodou e haihai hua nia mee hala i godou mehanga, goodou e gaiaa i godou mehanga, e gaiaa labelaa nia dama a Christ!

<sup>9</sup> Goodou ede iloo bolo digau huaidu le edeemee di hai mee gi Teenua King o God? Goodou hudee bida halahalau ina goodou: digau

ala e hai be di manu, be e daumaha ang gi nia balu god, be e manawa hai be di manu, be e hai di huaidu taane gi taane,

<sup>10</sup> be e gaiaa, be e hagagailaa ginia goloo, be e hiigeina tagaao, be e hai kaitilikai, be e lobodi mee, digau huogodoo aanei hagalee loo e hai mee gi Teenua King o God.

<sup>11</sup> Hunu gau i goodou nogo hai be digau aanei i mua, gei dolomeenei, gei goodou gu madammaa gi daha mo godou huaidu, gu hagadabu ang gi God, gei guu donu i baahi o God i di ingoo o tadau Dagi go Jesus Christ mo di Hagataalunga o tadau God.

*Hai hegau gi godou huaidina e hagadamada a God*

<sup>12</sup> Tangada ga helekai, “Gu dumaalia mai gi heia di ingoo hua di mee.” Uaa, malaa nia mee huogodoo la hagalee humalia adu gi di goe. Au e mee di helekai bolo au gu dumaalia ginai gi heia di ingoo hua di mee, gei au hagalee dumaalia gi dahi mee gi heia au di hege ni di maa.\*

<sup>13</sup> Gei tangada e mee di helekai labelaa, “Nia meegai la anga hua gi tinae, gei tinae la anga hua gi nia meegai.” E donu, malaa, God ga hagalawa nia mee e lua aanei. Tuaidina la hagalee belee hai hegau gi di mouli hai be di manu, gei belee hai hegau gi Tagi, gei Tagi e madamada humalia i tuaidina.

<sup>14</sup> God ne haga mouli aga Tagi mai i di made, gei go Mee ga haga mouli aga gidaadou labelaa gi ono mogobuna.

---

\* **6.12:** 1-Corinthians 10.23

<sup>15</sup> Goodou e iloo bolo godou huaidina la nia manga ni tuaidina o Christ? Malaa, au e mee di kae di baahi tuaidina o Christ ga hagapuni gi tuaidina o di ahina huihui dono huaidina! Deesai! E deemee loo!

<sup>16</sup> Goodou e de iloo bolo taane ma ga hagabuni dono huaidina gi tuaidina o di ahina huihui dono huaidina, la gaa hai tuaidina hua e dahi? Di Bee-baa Dabu e helekai madammaa, “Meemaa dogolua guu hai tuaidina hua e dahi.”\*

<sup>17</sup> Gei tangada dela e hagabuni ang gi Tagi, geia gu madalia a Mee guu hai di hagataalunga hua e dahi.

<sup>18</sup> Goodou haga mogowaa ina goodou gidaha mo di haihai be di manu. Nia huaidu huogodoo ala e hai go tangada, le e hai hua laadaha mo tuaidina, gei tangada dela e hai di huaidu mouli be di manu, ia e hai hua di huaidu ang gi dono huaidina.

<sup>19</sup> Goe ede iloo bolo do huaidina la di hale daumaha nidi Hagataalunga Dabu dela enoho i oo lodo, negowadu go God gi digoe? Goodou hagalee ni godou huaidina, goodou ni God.\*

<sup>20</sup> Go Mee dela ne hui goodou gidi hui damanaiee. Deenei laa, goodou gi hai hegau gi godou huaidina, e haga madamada ai God.

## 7

### *Nia heeu o taga hai lodo*

<sup>1</sup> Aanei agu helekai gi godou lede:

---

\* **6.16:** Genesis 2.24      \* **6.19:** 1-Corinthians 3.16; 2-Corinthians 6.16

Ma e humalia go taane ma ga hagalee hai dono lodo.

<sup>2</sup> Idimaa nia hangaahai huaidu ala e gila aga dolomeenei, taane le e humalia hua di hai dono lodo, di ahina gi heia dono lodo labelaa.

<sup>3</sup> Taane gi haga gila aga ina dono duhongo hegau anggi dono lodo, gei di ahina gi heia labelaa beelaa gi dono lodo.

<sup>4</sup> Di ahina hailodo hagalee bida dagi dono huaidina, go dono lodo e dagi. Dela gadoo taane hai lodo hagalee bida dagi dono huaidina, go dono lodo e dagi.

<sup>5</sup> Taga hailodo gihudee dagalili nau huaidina idi hiihai o taga hailodo, go dimaa hua be meemaa guu buni ngaadahi e hagamolooloo, e dalodalo i tama madagoaa, nomuli, gei meemaa guu mee di haga gila aga di hiihai o taga hai lodo, bolo gi de paagege hua ginaua gaa too gilodo di hagamada o Setan.

<sup>6</sup> Deenei la hagalee taganoho adu gi goodou, nia helekai hua aago.

<sup>7</sup> Au bolo goodou huogodoo gii hai be au, malaa God guu wanga nnagadilinga kisakis gi nia daangada, tangada nei dana kisakis duhongo hegau, tangada nei dana kisakis duhongo hegau.

<sup>8</sup> Ang gi digau ala digi hai nadau lodo mo digau guu mmade nadau lodo, au e helekai boloo: Ma koia e humalia di noho hua be au, dogu lodo ai.

<sup>9</sup> Maa digaula e deemee di hagakono, digaula giihai nadau lodo, idimaa, di hai lodo la koia e humalia i di noho i lodo di hiihai wele.

<sup>10</sup> Ang gi digau ala guu lawa di hai nadau lodo, taganoho igolo, hagalee taganoho ni aagu, gei

taganoho mai baahi o Tagi: Di ahina hailodo gi hudee diagia dono lodo.\*

<sup>11</sup> Maa di ahina gaa hudu gi daha dono lodo, geia e deemee di hai labelaa dono huai lodo, e hai eia gii donu i mua dono lodo. Taane hailodo e hagalee hai loo gi diagia dono lodo.

<sup>12</sup> Gei anggi digau ala igolo, deenei dagu haganoho, taganoho niaagu, hagalee ni Tagi: maa taane inia dama a Christ guulodo gi di ahina hagalee hagadonu, gei di ahina deela la gu hagababa bolo ia gaalodo gi taane idi waalooloo o dono mouli, gei taane deela gi hudee diagia a mee.

<sup>13</sup> Maa di ahina dama a Christ guulodo gi taane hagalee hagadonu, gei taane deela la gu hagababa bolo ia e lodo gi di ahina deela i di waalooloo o dono mouli, gei di ahina gi hudee diagia taane deela.

<sup>14</sup> Taane dono hagadonu ai, la guu dabu i dono hailodo anggi di ahina hagadonu, gei di ahina dela dono hagadonu ai, la guu dabu labelaa, i mee dela guu hai lodo anggi taane hagadonu. Maga hai beela, nia dama meemaa e dabu i baahi o God. Gei di maa ga hagalee hai beela, nia dama meemaa e hai be nia dama ni di bouli.

<sup>15</sup> Maa tangada hagalee hagadonu ga diiagi dono lodo, heia a mee gii hana. Taane be di ahina dela gu hagadonu le hagalee dau gi di mee beenei. God ne gahi mai gidaadou gi mouli noho manawa lamalia.

<sup>16</sup> Di ahina dama a Christ, goe e iloo di aha bolo

---

\* **7.10:** Matthew 5.32; 19.9; Mark 10.11-12; Luke 16.18

goe hagalee haga mouli doo lodo? Goe go taane dama a Christ, goe e iloo di aha bolo goe hagalee haga mouli doo lodo?

*Mouli be doo gahi go God*

<sup>17</sup> Tangada nei mo tangada nei gi mouli hua be di kisakis dumaalia a God anggi deia, ge gi mouli hua be dono mouli i dono madagoaa dela ne gahi go God. Deenei taganoho dela e agoago ko au i lodo nia nohongo dabu huogodoo.

<sup>18</sup> Maa taane ne sirkumsais guu kae di gahigahi a God, geia gi hudee hagamada e daa gi daha nia maaka o di sirkumsais; maa taane digi sirkumsais guu kae di gahigahi a God, gei mee gi hudee sirkumsais ina eia.

<sup>19</sup> Maa taane gu sirkumsais be digi sirkumsais la dono hadinga ai. Di mee dono hadinga la go di haga gila aga nnaganoho a God.

<sup>20</sup> Tangada nei mo tangada nei gii noho hua beelaa be dono mouli i dono madagoaa ne gahi go God.

<sup>21</sup> Goe nogo hai di hege i do madagoaa ne gahi mai go God? E humalia, goe hudee manawagee. Maa goe gu iai do madagoaa humalia e dagaloaha, e humalia, hai hegau ginai.

<sup>22</sup> Di hege ma gaa gahi go Tagi, la gu dagaloaha i baahi o Tagi, dela gadoo tangada dagaloaha ma ga gahi mai go Christ, mee guu hai di hege ni Christ.

<sup>23</sup> God guu lawa di hui goodou gi di hui aamua, malaa goodou gi hudee hege gi nia daangada.

<sup>24</sup> Ogu duaahina nei, tangada nei mo tangada nei gii noho hua beelaa i lodo dono mouli

bunianga gi God, gadoo be dono mouli i dono madagoaa ne gahi go God.

*Nia heeu i digau digi hailodo mo digau guu mmade nadau lodo*

<sup>25</sup> Deenei di hai o digau digi hai nadau lodo, dagu haganoho mai i baahi o Tagi ai, gei deenei la di hagamaanadu hua niaagu anggi digau beenei, idimaa, au tangada e mee di hagadonu go goodou mai i tumaalia o Tagi.

<sup>26</sup> Deenei dagu hagamaanadu: idimaa di haingadaa o lodo di madagoaa dolomeenei, ma koia e humalia maa goodou gaa noho hua be goodou e noho dolomeenei.

<sup>27</sup> Goe do lodo ahina i golo hudee hudua a mee gi daha. Goe digi hai doo lodo, hudee hai doo lodo.

<sup>28</sup> Maa goe gaa hai doo lodo, la dono huaidu ai. Maa di ahina gaa hai dono lodo, la dono huaidu ai. Gei digau hailodo gaa tale gi nia haingadaa i lodo di mouli deenei, gei au bolo nia hagadilinga haingadaa beenei, la hagalee hai gii tale adu gi goodou.

<sup>29</sup> Ogu ihoo duaahina nei, deenei dagu mee e hiihai e helekaiiei au adu gi goodou: di madagoaa gu bodobodo loo, deenei di mee dela e humalia bolo nia daane ala guu hai nadau lodo, la gi mouli be digau nadau lodo ai.

<sup>30</sup> Digau ala e tangitangi, la gii hai be digau hagalee lodo huaidu. Digau ala e tenetene, la gii hai be digau nadau tene ai. Digau ala e hui nadau goloo, la gii hai bolo nadau mee ai.

<sup>31</sup> Digau ala e hai hegau gi nia goloo o henuailala, la hudee hai bolo ne bau hua mo nia maa,

idimaa, nia mee o henuailala nei le e limalima hua dono hagalee.

<sup>32</sup> Au e hiihai bolo goodou gi hudee hagamaanadu ina nia haga daadaamee. Tangada dela dono lodo ai, le e hagabaubau hua dana hai dela e hai nnegau a Tagi, idimaa, mee e hiihai e haga tenetene di manawa o Tagi.

<sup>33</sup> Gei tangada dela guuhai dono lodo, le e hagabaubau nia mee o henuailala, be dehee dana hai dela e mee di haga tenetene ai dono lodo.

<sup>34</sup> Deeneilaa, ilodohua ana hagamaanadu la gu manga lua. Di ahina be go tama ahina madammaa le e hagabaubau hua nia mee o Tagi, idimaa, mee e hiihai huoloo bolo dono huaidina mo dono hagataalunga le e hagadabu ang gi Tagi. Gei di ahina guuhai dono lodo, le e daadaamee gi nia mee o henuailala, idimaa, mee e hiihai e haga tenetene dono lodo.

<sup>35</sup> Au e helekai nia mee aanei, idimaa, au e hiihai belee hagamaamaa goodou. Au hagalee bule goodou. Au e hiihai bolo goodou gi heia nia mee ala e humalia mo nia mee ala e donu, gei goodou gaa hai hege ang gi Tagi i di manawa madammaa, gei e odi anga.

<sup>36</sup> Maa taane modi ahina gu hagababa bolo e haga hailodo, nomuli gei meemaa gu hagamaanadu bolo ginaua hagalee noho, gei di ahina le e mouli humalia i lodo nia ngadau aalaa, gei taane gu hiihai huoloo bolo elodo gi mee, taane le e hai gi hagagila dono hiihai. Deenei la hagalee di mee hala. Meemaa belee haga hai lodo.

<sup>37</sup> Maa taane ga hagamaanadu hai donu, ga



hagalee hono go dahi maanadu, e hagamaanadu madammaa bolo ia e hagalee hailodo gidi tama ahina deela, taane deenei la guu hai di mee hai donu.

<sup>38</sup> Deenei laa, taane magaa hai dono lodo, le e humalia hua, gei taane dela bolo ia hagalee hai dono lodo, la koia e humalia.

<sup>39</sup> Di ahina guu hai dono lodo e deemee di hai labelaa dono huai lodo maa dono lodo donu le e mouli hua igolo. Maa dono lodo la guu made, geia guu mee hua di hai dono lodo gi taane dela e hiihai gineia, malaa gii hai di tama ni Christ.

<sup>40</sup> Mee koia gatenetene magaa hai bolo ia e noho hua beelaa, hagalee hai dono lodo. Deenei di hai o dagu hagamaanadu, gei au e hagadagadagagee bolo ma go di Hagataalunga o God dela ne haga honu au gi nia mee aanei.

## 8

### *Meegai tigidaumaha gi nia balu god*

<sup>1</sup> Deenei di agoago inia meegai ala ne tigidaumaha anggi nia balu god: E donu bolo gidaadou huogodoo e iloo nia mee. Di iloo e hai gidaadou gi maanadu bolo gidaadou digau hagalabagau, gei di aloho e haga maaloo aga.

<sup>2</sup> Tangada dela bolo ia gu iloo nia mee, ia digi iloo nia mee ala belee hai gi iloo ia.

<sup>3</sup> Gei tangada dela e aloho i God, deela tangada a God e iloo ai.

<sup>4</sup> Malaa, di gai o nia meegai ala e tigidaumaha anggi nia balu god, gidaadou gu iloo bolo di balu god la di balu mee ni henuailala, gei gidaadou gu iloo bolo ma di God hua e dahi.

<sup>5</sup> Ma e aha maa nia god e logo i di langi be i henuailala e haga ingoo bolo nia “god” mono dagi,

<sup>6</sup> gei tadau God la di God hua e dahi, go Tamana dela ne hai nia mee huogodoo, gei dela hogi e mouli ginai gidaadou. Gei Tagi hua e dahi, go Jesus Christ. Nia mee huogodoo ne hai mai i Mee, gei dela hogi gidaadou e mouli mai i Mee.

<sup>7</sup> Hagalee huogodoo e iloo di tonu deenei. Hunu daangada gu hoohoo gi nia balu god, delaa laa, di madagoaa digaula ma gaagai nia meegai beenei, digaula e maanadu bolo ginaadou ne tigidaumaha gi di balu god, idimaa nadau hagamaanadu le epaagege, digaula e hai bolo ginaadou gu hagamilimilia go nia meegai.

<sup>8</sup> Nia meegai le hagalee hagamaaloo tadau buni anga gi God. Gidaadou e hagalee kili gi daha tadau mee maa gidaadou ga hagalee miami, gei e hagalee kae tadau mee maa gidaadou ga miami.

<sup>9</sup> Pula i godou hangaahai, godou hegau daga-loaha gi hudee heia digau paagege gii too gi lodo di huaidu.

<sup>10</sup> Maa tangada dela e bagege dono hagadonu i nia mee aanei, ga mmada adu gi goodou ala gu maalama e miamiami i lodo di hale daumaha balu god, malaa, dono gidee di mee deenei, la hagalee gaa hai a mee gi hiihai di gai nia meegai ala gu tigidaumaha ang gi nia balu god?

<sup>11</sup> Malaa, di godou duaahina bagege dono hagadonu dela ne made ginai a Christ, la gaa made, ne hidi mai i godou iloo mee.

<sup>12</sup> Di hai deenei, goodou guu hai di huaidu ang gi Christ i di godou hai di huaidu ang gi godou duaahina, mo di haga huaidu nia manawa o digau

paagege nadau hagadonu.

<sup>13</sup> Malaa, maa e donu bolo ma go agu meegai e hidi dogu duaahina gaa doo gilodo di huaidu, malaa, au ga hagalee gai nia goneiga labelaa, gi dee doo dogu duaahina gi lodo di huaidu.

## 9

### *Mogobuna o tangada agoago hagau*

<sup>1</sup> Au hagalee tangada moholo? Au hagalee tangada agoago hagau? Au digi mmada gi Jesus tadau Dagi? Goodou hagalee go nia huwa o agu hegau ang gi Tagi?

<sup>2</sup> Ma e aha maa nia daangada e hagalee hai bolo au tangada agoago hagau, gei goodou e hai bolo au tangada agoago hagau donu, idimaa, godou mouli buni anga gi Tagi e haga modongoohia aga agu hegau dangada agoago hagau.

<sup>3</sup> Deenei dagu hai eduuli au gidaha, idi madagoaa nia daangada ma ga helekai hai baahi mai.

<sup>4</sup> Ma e donu bolo ogu donu ai di miami ge e inu?

<sup>5</sup> Ma e hagalee ogu donu ai bolo au e daudali di hai digau agoago hagau ala i golo mo nia duaahina o Tagi mo Peter i dagu lahi di ahina hailodo dama a Christ dalia au i dogu hana e hagadele di Longo Humalia?

<sup>6</sup> Be go gimaua mo Barnabas la hua ala e hai loo gi ngalua gi mau mouli?

<sup>7</sup> Tangada dauwa koai dela gaa bida hui hua dono ngalua i tauwa? Tangada dogi waini koai dela hagalee gai nia huwa o dana gowaa dogi waini? Tangada hagaloohi siibi koai dela hagalee e inu nia weuu o ana siibi?

<sup>8</sup> Ma hagalee bolo aanei hua nia ala mee ala belee hai hegau iei au. Nnaganoho le e helekai labelaa i nia maa.

<sup>9</sup> Gidaadou guu dau i Nnaganoho Moses:

“Goe hudee noodia di ngudu o di kau

dela e dagadagahi ana lii ‘wheat’.”

Ma go di kau dela e haamanawa ai a God?\*

<sup>10</sup> Ma hagalee go gidaadou ala ne helekai iei Mee? E donu ma ne hihi mai gi gidaadou. Tangada dela e dogi, mo tangada dela e hadi, meemaa gi ngalua i di hagadagadagagee bolo ginaua e hagahumalia ngaadahi mai nia huwa o di gowaa.

<sup>11</sup> Gimaadou guu lawa di dogi nia lii hagataalunga i godou baahi. Ma gu iehe maa gimaadou gaa hagi nia hagahumalia mai goodou?\*

<sup>12</sup> Maa digau ala i golo ga hai donu gi di hai mee o di hagamaamaa mai godou baahi, malaa gimaadou la hagalee ga hai mee gi nia mee mada gi nonua?

Gimaadou digi hai hegau gi madau donu. Gimaadou e hagakono inia haingadaa huogodoo bolo gi de hagahuaidu hua di Longo Humalia o Jesus Christ.

<sup>13</sup> Goodou guiloo bolo digau ala e hai nadau hegau ilodo di Hale Daumaha, le e miamiami mai di Hale Daumaha, gei digau ala e hai nadau tigidaumaha ihongo di gowaa hai tigidaumaha, digaula e miami ngaadahi inia mee ne tigidaumaha.\*

---

\* **9.9:** Deuteronomy 25.4; 1-Timothy 5.18      \* **9.11:** Romans 15.27

\* **9.13:** Deuteronomy 18.1

14 Dela gadoo di hai dela guu lawa di haganoho go Tagi, bolo digau ala ehula ehagadele di Longo Humalia, digaula emoulihua mai inia hegau o di Longo Humalia.\*

15 Gei au digi hai hegau gi nia donu aanei, gei au hagalee hihi adu gi goodou bolo gi heia mai nia mee aanei. Au bolo gii made hua i mua tangada magaa huli agu helekai donu gii hai nia helekai ono hadinga ai.

16 Au ogu donu ai bolo ehagaamu dagu hai agoago idi Longo Humalia, au guulawa di dugu bolo e hai tegau deenei. E huaidu mai gi di au, maa au digi agoago ina di Longo Humalia.

17 Maa au gaa bida hiihai e hai tegau deenei, gei au e kae dogu hui. Tegau deenei la tegau ni God ne dugu mai gi di au bolo au gi haga gila aga ina.

18 Di hui aha dela e kae ko au? Dogu hui la go di madagoaa humalia o di agoago di Longo Humalia dono hui ai, hagalee halahala ogu donu gi lodo di moomee di Longo Humalia.

19 Au tangada moholo, hagalee di hege ni tangada. Au guu hai au be di hege ni digau huogodoo, gi aali au di laha mai agu gau dogologo gi Christ.

20 Au guu hai be tangada o Jew i dogu madagoaa engalua ibaahi digaula, belee laha mai digaula gi di mouli. Ma e aha maa au hagalee noho ilala Nnaganoho Moses, gei au guu hai hua au be tangada e noho ilala nnaganoho aanei belee laha mai gi di mouli digau ala e noho ilala nnaganoho.

21 I di ala la hua, dogu madagoaa e ngalua dalia digau tuadimee, au emouli be digau tuadimee

---

\* **9.14:** Matthew 10.10; Luke 10.7

i daha mo nnaganoho digau o Jew belee laha mai digau tuadimee gi di mouli. Deenei la hagalee hai bolo au hagalee haga gila aga nnaganoho a God, gei au e noho i lala nnaganoho a Christ.

<sup>22</sup> I baahi digau ala e paagege nadau hagadonu, gei au guu hai au gi bagege gadoo be digaula, belee laha mai digaula gi di mouli. Deenei laa, nia mee huogodoo guu hai ko au ang gi digau huogodoo, belee laha mai ai hunu gau i digaula gi di mouli, be di hai dela e mee mai i dogu baahi.

<sup>23</sup> Au e haihai nia mee huogodoo aanei i di gili di Longo Humalia bolo gi hai mee au gi nia hagahumalia o di maa.

<sup>24</sup> Goodou gu iloo bolo digau dogologo le e llele i di hoiaa, malaa tangada hua e dahi dela e kae dono hui. Goodou llele hagamahi gii kae godou hui.

<sup>25</sup> Digau hai dadaagala huogodoo e haga wouwou i mua di nadau dadaagala gii mee di kae nadau hui. Di hui deenei la di mee hua e odi gi daha, gei gidaadou hagamahi gi heia go di mee dono hagaodi ai.

<sup>26</sup> Deenei di hai elele huudonu iei au bolo gii tugi i di laini, e hai gadoo be tangada hai dongodongo dela hagalee dongodongo balumee.

<sup>27</sup> Au e hagamahi e agoago dogu huaidina be tangada hai dadaagala, e aago di maa gi heia go nia mee belee hai. Gidee hidimai hua au e hagalee dau i muli agu agoago gi digau ala i golo gi heia be agu mee e haihai.

## 10

*Hudee daumaha ang gi nia balu god*

<sup>1</sup> Ogu duaahina nei, au e hiihai bolo goodou gi maanadu ina nia mee ala ne hai ang gi tadau maadua mmaadua ala nogo daudali a Moses. Digaula huogodoo nogo hula i lala di gololangi dela nogo duuli digaula. Digaula huogodoo gu lloo adu hagahumalia laa lodo Tai Mmee.\*

<sup>2</sup> Ilala di gololangi mo ilodo di tai, digaula gu babdais guu hai nia daangada a Moses.

<sup>3</sup> Huogodoo nogo miami i tagadilinga meegai hua e dahi mai i di hagataalunga,\*

<sup>4</sup> gei nogo inu i nia wai o di hagataalunga, idimaa, digaula nogo inu mai i di hadugalaa o di hagataalunga. Di hadugalaa la go Christ dela nogo hana madalia digaula.\*

<sup>5</sup> Malaa God ne de hiihai gi di baahi dogologo digaula, gei nadau huaidina gu mmoemmoe dagidahi i lodo di anggowaa.\*

<sup>6</sup> Deeneilaa, di mee deenei ne hai belee aago gidaadou, bolo gi hudee hiihai di hai nia mee huaidu digaula nogo hai,\*

<sup>7</sup> be e daumaha ang gi nia balu god, gadoo be hunu gau i digaula. Di Beebaa Dabu e helekai, “Digaula guu hai nadau hagamiami, gu libaliba, gu gagaalege, guu hai nia huaidu ala i golo.”\*

<sup>8</sup> Gidaadou hudee hai di huaidu odi manawa manu, gadoo be hunu gau i digaula, dela ne hidi ai nia daangada e madalua

---

\* **10.1:** Exodus 13.21-22; 14.22-29

\* **10.3:** Exodus 16.35

\* **10.4:** Exodus 17.6; Numbers 20.11

\* **10.5:** Numbers 14.29-30

\* **10.6:** Numbers 11.4

\* **10.7:** Exodus 32.6

maa dolu mana (23,000) ne mmade i di laangi e dahi.\*

<sup>9</sup> Gidaadou hudee hagamada ina Dimaadua, be hunu gau i digaula, ne hidi ai digaula ga daaligi go nia gihaa lodo henua.\*

<sup>10</sup> Gidaadou hudee haitamu, be hunu gau i digaula ala ne hai beenei, ga hidi ai digaula gaa mmade i taaligi a tangada di langi.\*

<sup>11</sup> Nia mee aanei huogodoo ne hai ang gi tadau maadua mmaadua belee hai dahi ala mee ang gi digau ala igolo, gei ne hihi gilala belee hai di mee e haga langahia mai gi gidaadou, idimaa, gidaadou e noho i nia laangi hoohoo gi di hagaodi.

<sup>12</sup> Maa goodou gu hagamaanadu bolo goodou guu mau di tuu, goodou gii pula i goodou gi dee tinga.

<sup>13</sup> Nia hagamada huogodoo ala gutale adu gi goodou, le e tale anga labelaa gi digau huogodoo. God le edaahi dana hagababa, Mee e hagalee dumaalia adu gi goodou ginia hagamada ala e deemee di haga magedaa go goodou. Di madagoaa di hagamada, gei Mee gagowadu gi goodou di mahi i nia hagamada modi ala dela e tanga goodou gi daha.

<sup>14</sup> Ogu ihoo hagaaloho, haga mogowaa ina goodou i di hai daumaha ang gi nia balu god.

<sup>15</sup> Au e helehelekai adu gi goodou digau maalama, haginina ina be maa diaha dela e helekai iei au.

<sup>16</sup> Di ibu dela e danggee ai ge e hai hegau ai gidaadou i lodo Tagamiami Dabu, e inu gidaadou

\* **10.8:** Numbers 25.1-18  
Numbers 16.41-49

\* **10.9:** Numbers 21.5-6

\* **10.10:**



ngaadahi inia dodo o Christ. Di madagoaa ma gaa gai di palaawaa ginigini, gidaadou ne miami ngaadahi i tuaidina o Christ.\*

<sup>17</sup> Di palaawaa hua e dahi deenei, gei gidaadou e dogologo, gidaadou guu hai hua tuaidina e dahi, idimaa, gidaadou ne miami mai idi palaawaa e dahi.

<sup>18</sup> Haga maanadu ina digau Israel: hunu gau e miami inia meegai tigidaumaha, gei digaula e bunianga gi di hai daumaha odi gowaa hai tigidaumaha.\*

<sup>19</sup> Dagu mee dela e helekai iei au, le e hai dono hadinga bolo di hai daumaha ang gi nia balu god mo nia meegai ala e tigidaumaha ang gi nia maa la dono dahidamee i golo?

<sup>20</sup> Deesai! Nia tigidaumaha ala e hai i hongo di gowaa hai tigidaumaha digau odi bouli, la nia mee hua e hai ang gi nia hagataalunga huaidu, hagalee hai ang gi God. Au hagalee hiihai bolo goodou gi bunianga gi nia hagataalunga huaidu.\*

<sup>21</sup> Goodou e deemee di inu i di ibu a Tagi, mo di ibu o nia hagataalunga huaidu. Goodou e deemee di miami i teebele o Tagi, mo teebele o nia hagataalunga huaidu.

<sup>22</sup> E hai behee, gidaadou e hiihai e hai tadau Dagi gi dubua? Gidaadou e hai bolo gidaadou e maaloo i Mee?\*

<sup>23</sup> Hunu gau e helekai boloo, “Gu dugu mai gi gimaadou gi heia nia mee huogodoo.” E donu,

---

\* **10.16:** Matthew 26.26-28; Mark 14.22-24; Luke 22.19-20

\* **10.18:** Leviticus 7.6    \* **10.20:** Deuteronomy 32.17    \* **10.22:** Deuteronomy 32.21

gei nia mee huogodoo la hagalee humalia. “Gu dugu mai gi heia nia mee huogodoo,” gei nia mee huogodoo la ono hagamaamaa humalia ai.\*

<sup>24</sup> Goodou hudee halahala ina nia mee ala e bida hagahumalia goodou, tangada nei mo tangada nei gi halahala ina nia mee ala e mee di hagahumalia digau ala i golo.

<sup>25</sup> Goodou e mee di gai di ingoo hua di mee ala e huihui i di gowaa huihui goneiga, hudee heheeu e logo, ma deai dono hala adu gi godou lodo ai.

<sup>26</sup> Idimaa di Beebaa Dabu e helekai, “Dimaadua e hai mee gi henuailala hagatau mo ono haga honu huogodoo.”\*

<sup>27</sup> Maa tangada e de hagadonu, ga hagagahi goodou e miami i dono hale, goodou hula, miami nia meegai a maa ala ga gowadu gi goodou, gei goodou hudee heheeu ina nia meegai aalaa, ma deai dono hala adu gi godou lodo ai.

<sup>28</sup> Maa tangada ga helekai adu boloo, “Nia meegai aanei ne tigidaumaha ang gi nia balu god,” malaa, goodou hudee geina nia meegai aalaa, e hagagila di maanadu o tangada dela ne hagi adu gi goodou mo di hagagila di hagamaanadu dela e donu.

<sup>29</sup> E hai boloo, ma hagalee go godou iloo, gei go di hagamaanadu o tangada dela ne hagi adu gi goodou.

Tangada ga heeu, “Malaa e hai beheeu, ugu donu belee hai agu mee le e aha ala e mee di duuli go nia maanadu o tuai dangada?”

---

\* **10.23:** 1-Corinthians 6.12      \* **10.26:** Pisalem 24.1

<sup>30</sup> Maa au ga danggee ang gi God i agu meegai, malaa tangada le e aha dela e leelee hagahuaidu i agu meegai ala guu lawa di hai dagu danggee?”

<sup>31</sup> Malaa, di mee dela gaa gai, be e inu, be nia mee huogodoo ala ma gaa hai go goodou, heia huogodoo e haga madamada ai a God.

<sup>32</sup> Ilodo godou mouli, hudee hai dahi mee dela gaa hidi ai di huaidu i baahi digau o Jew, be i baahi digau tuadimee, be i baahi digau o di no-hongo dabu a God.

<sup>33</sup> Kawe i di au. Au e hagamahi e haga manawa lamalia nia daangada huogodoo i nia mee huogodoo ala e hai ko au, hagalee hagamaanadu agu mee ala belee hagahumalia au, gei nia mee ala e hagahumalia nia daangada huogodoo, bolo gi mouli ai digaula.

## 11

<sup>1</sup> Goodou gikawe idi au, gadoo be au dela e kawe i Christ.\*

### *Di gahu di libogo i taumaha*

<sup>2</sup> Au ehagaamu goodou idi godou langahia au i nia madagoaa huogodoo, mo di daudali agu agoago adu gi goodou.

<sup>3</sup> Au bolo goodou gi iloo: Christ laa i mugi nua nia daangada, taane hai lodo laa i mugi nua dono lodo, gei God laa i mugi nua o Christ.

<sup>4</sup> Taane dela magadalodalo be agoago i nnelekai a God i taumaha, ge e gahu i di goobai, e haga balumee hua a Christ.

---

\* **11.1:** 1-Corinthians 4.16; Philippians 3.17

<sup>5</sup> Di ahina dela magadalodalo be agoago nnelekai a God ilodo digau dogologo, gei digi gahudia dono libogo, geia e hagabalumee dono lodo. Mee e hai hua be di ahina nedahi dono libogo gi di ngadihole.

<sup>6</sup> Maa di ahina ga hagalee gahu dono libogo, e humalia hua di dahi dono libogo. Idimaa ma e haga langaadia anggi di ahina di dahi dono libogo, gei mee gi gahu ina dono libogo.

<sup>7</sup> Hagalee e humalia bolo taane e gahu dono libogo, idimaa, go mee go di ada hagamodongoohia madamada o God, gei di ahina la di ada hagamodongoohia madamada o taane.\*

<sup>8</sup> Taane la hagalee ne hai mai i di ahina, di ahina ne hai mai i taane.\*

<sup>9</sup> Gei taane la hagalee ne hai anggi di ahina, di ahina ne hai anggi taane.

<sup>10</sup> Mai tadinga deenei, idimaa go digau dilangi, di ahina e hailoo giigahu dono libogo gi modongoohia bolo ia ilala nia mogobuna o dono lodo.

<sup>11</sup> Ilodo tatau mouli buni anga gi Tagi, di ahina la hagalee mouli hua i daha mo taane, gei taane hagalee mouli labelaa i daha mo di ahina.

<sup>12</sup> Idimaa, di ahina ne hai mai i taane, dela gadoo taane le e haanau mai go di ahina, gei nia mee huogodoo e hai mai i baahi o God.

<sup>13</sup> Goodou hagamaanaduina be di maa e humalia go di ahina magaa hai ana dalodalo ilodo di hai daumaha digau dogologo gei digi gahu dono libogo.

---

\* **11.7:** Genesis 1.26-27      \* **11.8:** Genesis 2.18-23

<sup>14</sup> Ilodo godou maanadu le e aago adu gi goodou bolo ma di mee haga langadia daane ma gaa lloo nadau libogo.

<sup>15</sup> Gei nia ngaahulu i hongo di libogo di ahina la di hagamadamada, ne hagalloo belee gahu dono libogo.

<sup>16</sup> Maa tangada ga hai baahi ang gi di mee dela gu haga noho, geia gi iloo bolo deenei di mee dela gu haga noho, e hai hegau ai gimaadou mo nia nohongo dabu a God e daudali i di madagoaa hai daumaha.

*Tagamiami Dabu o Tagi*

*(Matthew 26.26-29; Mark 14.22-25; Luke 22.14-20)*

<sup>17</sup> Ilodo hua nia mee ala e haga noho dolomeenei, au hagalee hagaamu goodou, idimaa, godou dagabuli hai daumaha la dono hadinga ai, gei ne hagahuaidu hua goodou.

<sup>18</sup> Kaedahi, au gulongono bolo goodou e dugudugugee goodou, idi godou dagabuli nohongo dabu, malaa gei au e hagadonu di mee deenei.

<sup>19</sup> Gei e donu, tee buni e hai gi igolo i godou mehanga bolo gi haga modongoohia be koai i goodou dela e donu.

<sup>20</sup> Di godou dagabuli mai, goodou hagalee e miami Tagamiami o Tagi.

<sup>21</sup> Di godou miami, tangada nei mo tangada nei guu bida miami hua digi taaliala digau huogodoo ala igolo, gei hunu gau e noho hiigai, hunu gau gu libaliba.

<sup>22</sup> Godou hale e miami be e inu goodou ai? Be goodou e hagabalumee di nohongo dabu a God ge

haga langaadia digau ala hagaloale? Ma di aha dela belee helekai iei au adu gi goodou? Au belee hagaamu goodou? Deesai loo!

<sup>23</sup> Agu agoago adu gi goodou ne gaamai i baahi o Tagi boloo: Tagi go Jesus, i di boo ne hagi anga a Mee, ne dahi aga dana palaawaa,

<sup>24</sup> ga danggee ang gi God, ga ginigini, ga helekai, “Deenei la go dogu huaidina, dela egowadu gi goodou. Heia di mee deenei, e haga langalangahia Au.”

<sup>25</sup> Muli hua di nadau miami, Mee ga dahi aga dana ibu waini, ga helekai, “Di ibu waini deenei la di hagababa hoou a God dela ne hai gii donu gi ogu dodo. Goodou ga inu di maa, heia di mee e haga langahia Au.”\*

<sup>26</sup> Nia madagoaa huogodoo goodou ma gaa gai di palaawaa deenei, gei e inu di ibu deenei, goodou ga hagadele di made o Tagi, gaa dae loo gi dono hanimo.

<sup>27</sup> Maa tangada gaa gai di palaawaa, mo di inu i di ibu o Tagi i di ala dela hagalee hagalaamua a Mee, geia gu ihala i di huaidu hai baahi gi tuaidina o Tagi mo ono dodo.

<sup>28</sup> Malaa, goodou tei gii bida hagadina ina ia i mua, gaa gai laa di palaawaa mo di inu i di ibu.

<sup>29</sup> Maa tangada gaa gai di palaawaa mo di inu di ibu gei e hagalee modongoohia tadinga o tuaidina o Tagi, geia e bida hagahuaidu ia i dono gai di palaawaa mo di inu di ibu.

<sup>30</sup> Deelaa ne hidi mai goodou dogologo e magi mo e paagege, gei hunu gau guu mmade.

---

\* **11.25:** Exodus 24.6-8; Jeremiah 31.31-34

<sup>31</sup> Maa gidaadou ga haga dina gidaadou i mua, gidaadou hagalee hagi aga go God.

<sup>32</sup> Tadau hagi aga mai baahi o Dimaadua le e aago mai gidaadou, gi dee kili gidaadou gi daha dalia digau henuailala.

<sup>33</sup> Ogu duaahina nei, di madagoaa goodou ma ga dagabuli mai belee miami Tagamiami o Tagi, hagadau taalia godou ihoo.

<sup>34</sup> Maa tangada gu hiigai, geia gi miami i dono hale, gi dee dau hua goodou gi di hagi aga a God i di godou dagabuli gi di gowaa e dahi.

Gei nia mee ala i golo ga haga donu laa ko au i dogu madagoaa ma gaa dau i godou baahi.

## 12

### *Nia wanga dehuia mai di Hagataalunga Dabu*

<sup>1</sup> Ogu duaahina daane mo ahina, gidaadou e helekai i nia kisakis mai di Hagataalunga Dabu ala ne hihi ai godou lede. Au e hiihai bolo goodou gi iloo di tonu o nia maa.

<sup>2</sup> Goodou e iloo bolo i di godou madagoaa nogo noho i lodo di bouli, goodou nogo dagi gee go nia hagadilinga ala daumaha ang gi nia ada god ono mouli ai.

<sup>3</sup> Au e hagiadu gi iloo goodou bolo maa tangada ma gaa dagi go di Hagataalunga Dabu geia e deemee di helekai hagahuaidu a Jesus. Gei tangada e deemee di helekai bolo Jesus la go Tagi, maa ia le hagalee dagi go di Hagataalunga Dabu.

<sup>4</sup> Nia hagadilinga wanga dehuia hagataalunga igolo, gei di Hagataalunga lahua e wanga nia maa.\*

<sup>5</sup> Nia hagadilinga ala hai hegau igolo, gei Tagi hua e dahi dela e ngalua ginai.

<sup>6</sup> Nia hagadilinga iloo igolo e hai nnegau, gei di God hua e dahi dela e wanga di iloo gi nia daangada huogodoo di hai nadau hegau.

<sup>7</sup> Tangada nei mo tangada nei ekae di hagamodongoohia mai di Hagataalunga Dabu, e hagahumalia nia daangada huogodoo.

<sup>8</sup> Di Hagataalunga e wanga gi tangada nei nia helekai kabemee, di Hagataalunga la hua e wanga gi tangada dela igolo nia helekai iloo.

<sup>9</sup> Di Hagataalunga la hua e wanga di hagadonu gi tangada e dahi, gei anggi tuai dangada, Mee e wanga di mogobuna hagahili magi.

<sup>10</sup> Di Hagataalunga la hua dela e wanga gi tangada di mogobuna e hai nia mee hagagoboina, anggi tangada dela igolo di agoago nia helekai a God, gei anggi tuai dangada di modongoohia nnegau mai i di Hagataalunga Dabu mo nnegau ala hagalee mai i di Hagataalunga Dabu. Anga labelaa gi tangada igolo di iloo di helekai nia helekai henuagee, gei anga labelaa gi tangada igolo di iloo di haga modongoohia nia mee ne helekai ai.

<sup>11</sup> Malaa, di Hagataalunga hua e dahi dela e hai nia mee huogodoo aanei, e wanga gi tangada nei mo tangada nei dono duhongo hegau kisakis, gii hai be dono hiihai.

---

\* **12.4:** Romans 12.6-8



*Tuaidina e dahi e logo ono dudaginga*

<sup>12</sup> Christ le e hai be tuaidina e dahi dela e logo ono dudaginga. Tuaidina hua e dahi, ne hai gi nia dudaginga e logo.\*

<sup>13</sup> Gidaadou huogodoo gu babdais idi hagataalunga e dahi gilodo tuaidina e dahi. Gidaadou digau o Jew be digau tuadimee, hege be dagaloaha, gidaadou huogodoo guinu idi Hagataalunga e dahi.

<sup>14</sup> Tuaidina la hagalee tudaginga hua e dahi, nia dudaginga e logo.

<sup>15</sup> Maa di wae ga helekai boloo, “Idimaa au hagalee di lima, gei au hagalee di mee ni tuaidina,” nnelekai aanei e deemee di daa di wae gi daha mo tuaidina.

<sup>16</sup> Maa talinga ga helekai boloo, “Au hagalee di golomada, au hagalee di mee ni tuaidina,” nnelekai aanei e deemee di daa talinga gi daha mo tuaidina.

<sup>17</sup> Maa tuaidina hagatau la gaa hai di golomada, malaa gei mee e hagalongo behe? Gei tuaidina hagatau la gaa hai talinga, gei mee e hagadungu ana mee gi di aha?

<sup>18</sup> Gei God ne haganohonoho nia dudaginga huogodoo ilodo tuaidina tangada, gii hai be dana hiihai.

<sup>19</sup> Ma e deemee di hai tuaidina, maa huogodoo gaa hai tudaginga hua e dahi!

<sup>20</sup> Gei dolomeenei nia dudaginga la guu logo, gei tuaidina hua e dahi.

<sup>21</sup> Di golomada e deemee di helekai anggi di babaalima, “Au hagalee e angaanga gi do

---

\* **12.12:** Romans 12.4-5

hagamaamaa.” E hai labelaa be di libogo ang gi nia babaawae, “Au hagalee e angaanga adu gi goolua.”

<sup>22</sup> Gei hunu dudaginga e paagege, gei nia maa e hagalabagau huoloo di hai hegau.

<sup>23</sup> Gei nia dudaginga ala e dugu go gidaadou bolo hagalee dahidamee, aalaa tadau mee koia e benebene. Gei nia dudaginga ala e huaidu dono mmada ginai, le e benebene hagalabagau,

<sup>24</sup> ala hagalee hai mee ginai nia dudaginga madamada. Gei God gu haga noho tadau huaidina, guu wanga dono aamua damana gi nia dudaginga ala nadau madamada ai,

<sup>25</sup> bolo tee buni gi hudee heia gi igolo ilodo tadau huaidina, gei nia dudaginga huogodoo gi buni anga gi di hagadau maamaa.

<sup>26</sup> Maa tudaginga e dahi magammae, nia dudaginga huogodoo e mmae dalia di maa. Maa tudaginga e dahi gaa kae dono hagahumalia, nia dudaginga huogodoo e tenetene labelaa.

<sup>27</sup> Goodou huogodoo la tuaidina ni Christ, tangada nei mo tangada nei nia dudaginga ni tuaidina deenei.

<sup>28</sup> God ne haga noho nia lohongo huogodoo o lodo di nohongo dabu: di tahi go nia daangada agoago hagau, di lua go nia soukohp, di tolu go nia daangada aago, nomuli go digau ala e hai nadau mogobuna haga goboina, nomuli go digau ala guu wanga ginai di mogobuna hagahili magi, be e hagamaamaa digau ala igolo, be e dagi digaula, be go digau ala e mee di helekai i nnelekai henua gee.\*

---

\* **12.28:** Ephesians 4.11

<sup>29</sup> Hagalee huogodoo e hai digau agoago hagau, be nia soukohp, be digau aago. Hagalee huogodoo nadau mogobuna e hai nia mee hagagoboina,

<sup>30</sup> be ehagahili nia magi o digau magi, be ehelekai inia helekai henuagee, be e haga modongoohia nia helekai aanei.

<sup>31</sup> Gi haa manawa i nia kisakis hagalabagau. Kaedahi go di ala deenei.

## 13

### *Di aloho*

<sup>1</sup> Maa au ga iloo nnelekai o nia daangada, mo nnelekai o digau di langi, gei di aloho la hagalee i dogu baahi, malaa, agu helekai le e hai gadoo be di lee baalanga balumee, be di beelee dela e tangitangi balumee.

<sup>2</sup> Maa au gaakae di wanga dehuia onia agoago hagamaaloo a God, gei guiloo modi modongoohia nia mee huogodoo ala enngala, gei au guu honu i di hagadonu maaloo dela e mee di haga menegenege nia gonduu, gei di aloho la hagalee i dogu baahi, malaa, au la hagalee di mee.\*

<sup>3</sup> Maa au gaa wanga agu mee huogodoo gi daha, gaa dudu dogu huaidina gii wele, gei di aloho la hagalee i dogu baahi, malaa, nia mee aanei ono hadinga humalia mai gi di au ai.

<sup>4</sup> Di aloho le e manawa hila gilala, humalia, hagalee dubua, hagalee hagamuamua, ge hagalee hagapuu.

---

\* **13.2:** Matthew 17.20; 21.21; Mark 11.23

5 Di aloho la hagalee hagagouwa, ge hagalee manawa hagagailaa, be limalima di hagawelewele, be daahi nia mee huaidu.

6 Di aloho la hagalee tene gi nia mee huaidu, gei e tene hua gi nia mee ala e donu.

7 Di aloho le e benebene humalia inia madagoaa huogodoo, e hagadonu i nia madagoaa huogodoo, e hagadagadagagee inia madagoaa huogodoo, e hagakono i nia madagoaa huogodoo.

8 Di aloho le e hana hua beelaa, dono hagaodi ai. Nia helekai kokohp la iai ono hagalawa i golo. Nia hagadilinga helekai henua gee i golo dela ga hagalee. Di kabemee la ga mmaa gi daha.

9 Idimaa tadau kabemee le e dee dohu, mo tadau helekai kokohp le e dee dohu.

10 Di madagoaa humalia ga dau mai, gei nia mee ala e dee dohu la ga hagalee.

11 Dogu madagoaa nogo hai di tama, agu helekai, hagamaanadu mo agu hagabaubau la nia mee huogodoo dama. Gei dogu madagoaa ne madua, gei au guu dugu gi daha nia hegau o tama dului.

12 Dolomeenei gei gidaadou emmada gidi ada nehu i lodo di kalaadi, ga nomuli gaa mmada haga madammaa. Dolomeenei gei au gu iloo dului, gei nomuli ga iloo hagatau, gadoo be God dela e iloo Ia au.

13 Nia hagadilinga mee e dolu aanei e noho hua beelaa: di hagadonu, di hagadagadagagee, mo di aloho, gei di mee dela koia e aamua i nia maa, la go di aloho.

# 14

## *Nia wanga dehuia mai di Hagataalunga Dabu*

<sup>1</sup> Ma go di aloho dela belee hagamaha ginai goodou. Gi haamanawa i nia wanga dehuia o di Hagataalunga, kaedahi la go di hagadele nnelekai kokohp a God.

<sup>2</sup> Digau ala e helekai i nia helekai henua gee, la hagalee helekai gi nia daangada, gei e helekai hua anggi God, idimaa, ma tangada e iloo ia nia helekai digaula ai. Go di Hagataalunga dela ne haga helekai a mee gi nia mee ala e de iloo nia daangada.

<sup>3</sup> Gei digau ala e hagadele nnelekai kokohp a God, le ehagi anggi nia daangada, belee hagahumalia ge e haga manawa maaloo ge e haga tenetene digaula.

<sup>4</sup> Digau ala eleelee i nia helekai henua gee, le ehagamaamaa hua ginaadou. Gei digau ala e hagadele nnelekai a God, le ehagamaaloo di nohongo dabu hagatau.

<sup>5</sup> Au bolo goodou huogodoo gii mee di helehelekai i nia helekai henua gee, gei di mee dela koia e humalia la go goodou gi hagadele nia helekai kokohp a God. Idimaa, tangada dela e hagadele nnelekai a God, la koia e amua i tangada dela eleelee i nia hagadilinga helekai henua gee, go di maa hua be tangada i golo e mee di hagamodongoochia nia helekai tangada dela ne helekai ai, e hagamaaloo di nohongo dabu hagatau.

<sup>6</sup> Ogu duaahina nei, dogu hanadu gi godou baahi la dono hadinga aha maa au ga helehelekai

hua i nnelekai henua gee? Hagalee, be di maa koau hua ga gowadu gi goodou nia hagamodongoohia mai baahi o God, be nia iloo helekai Beebaa Dabu, be nia helekai agoago.

<sup>7</sup> E hai gadoo be nia mee hai daahili nadau mouli ai, be di mee ngiingii mo di 'harp'. Maa nia lee o nia maa ga hagalee tongaadahi, dehee di hai o tangada ga iloo ia be di maa di lee daahili behehe dela e hai go nia mee aanei?

<sup>8</sup> Di labaa dauwa ma ga ili de modongoohia dono lee, malaa koai dela e mee di hagatogomaalia ia gi tauwa?

<sup>9</sup> E hai gadoo be goodou ma ga leele inia helekai henua gee, gei hagalee haga donu gii donu humalia, malaa koai dela ga iloo ia? Malaa godou helekai ala e hai, le e leele hua balumee.

<sup>10</sup> Nia hagadilinga helekai e logowaahee i hen-uailala, gei nia helekai huogodoo la ono hadinga i golo.

<sup>11</sup> Maa au gade iloo nnelekai henua ala ne helekai ai, digau ala ne helekai nia maa guu hai digau henua gee ni aagu, gei au hogi guu hai tangada henua gee ni digaula.

<sup>12</sup> Idimaa goodou e hagamahi e hai mee ginia wanga dehuia mai di Hagataalunga, goodou hagamahi laa hongo nia mee huogodoo ala i golo e hai hegau gi nia wanga dehuia ala e hagamaaloo di nohongo dabu.

<sup>13</sup> Maa tangada e helekai inia helekai henua gee, geia gidalodalo idi hagamaamaa bolo gii mee di hagamodongoohia ana helekai.

<sup>14</sup> Maa au ga dalodalo inia helekai henua gee, go dogu hagataalunga la hua ne dalodalo, gei agu

maanadu la hagalee i golo.

<sup>15</sup> Dehee laa dagu mee gaa hai? Au ga dalodalo i dogu hagataalunga, gei au ga dalodalo labelaa i agu maanadu. Au ga daahili i dogu hagataalunga, gei au ga daahili labelaa i agu maanadu.

<sup>16</sup> Ma go do hagataalunga la hua dela e danggee anggi God, gei digau ala igolo le ehai bolo “Amen”\* behee gi dau dalodalo danggee? Idimaa, digaula e de iloo au helekai.

<sup>17</sup> Ma e aha maa dau dalodalo hagaamu a God le e humalia, gei hagalee hagamaamaa digau ala i golo.

<sup>18</sup> Au edanggee anggi God i dogu mada iloo eau i goodou huogodoo di leelee i nia helekai henua gee.

<sup>19</sup> Ilodo taumaha gei au gu hiihai huoloo bolo au e helekai hua i nia bida helekai e lima, ala koia edonu ginai nia daangada ilodo agu agoago, laa hongo nia bida helekai e mana (1,000) e logo, i nia helekai henua gee.

<sup>20</sup> Ogu duaahina nei, godou hagamaanadu gi hudee heia be nia maanadu dama. Goodou gi heia hua goodou be nia damalligi inia mee huaidu. Gei godou hagamaanadu gi heia be nia hagamaanadu daangada gu mmaadua.

<sup>21</sup> Ilodo di Beebaa Dabu la guu hihi boloo,  
 “Dimaadua ga helekai boloo,  
 ‘Au ga helekai gi agu daangada aanei  
 i nia helekai henua gee.  
 Gei Au ga helekai gi digaula

---

\* **14.16:** Tadinga di bida helekai *amen* le e hai bolo “e donu”

mai i lodo nia malau ngudu o digau nnenua mai  
i daha,  
gei agu daangada ga hagalee hagalongo mai  
gi di Au.’ ”\*

<sup>22</sup> Di wanga dehuia o di helehelekai henua gee,  
lago di haga modongoohia anggi digau  
de hagadonu, hagalee digau hagadonu. Gei  
di hagadele nnelekai kokohp a God, la di  
haga modongoohia anggi digau hagadonu,  
hagalee digau de hagadonu.

<sup>23</sup> Maa di nohongo dabu ga dagabuli gi di gowaa  
e dahi, ga daamada ga helehelekai i nia helekai  
henua gee, gei nia daangada ala digi longono di  
agoago be digau e de hagadonu ga ulu mai, di-  
gaula ga hagalee helekai bolo goodou huogodoo  
e boiboi?

<sup>24</sup> Gei di maa huogodoo ga helekai i nia helekai  
kokohp a God, gei tangada dela dono hagadonu  
ai, be tangada dela digi longono di agoago,  
ma ga ulu mai ga modongoohia anggi deia i ono  
huaidu, mai i ana mee huogodoo ala ne longono.  
Geia ga hagiaga gi ana mee huogodoo ala  
ne longono ia,

<sup>25</sup> gei ana hagamaanadu nngala ala i ono lodo,  
la ga modongoohia aga, geia ga dogoduli gilala,  
gaa bala ga daumaha gi God, ga helekai boloo,  
“E donu bolo God le e noho i godou lodo.”

*Di haganohonoho di hai daumaha*

<sup>26</sup> Ogu duaahina nei, deenei di mee  
e helekai iei au, goodou ma ga dagabuli mai  
belee hai daumaha, tangada e daahili, tangada

---

\* **14.21:** Isaiah 28.11-12



e agoago, tangada e hagadele nnelekai kokohp mai baahi o God, gei tangada e helekai i nnelekai henua gee, gei tangada e haga modongoohia nia helekai ne helekai ai. Malaa, nia mee huogodoo aanei e hai belee hagamaaloo di nohongo dabu.

<sup>27</sup> Maa tangada ga helekai i nia helekai henua gee, dogolua be hagalee gi dogologo baahi nua dogodolu e hagadau dagidahi e helekai, gei tangada igolo labelaa e hai loo gi hagamodongoohia nia helekai ala ne helekai ai.

<sup>28</sup> Maa tangada e haga modongoohia nnelekai ai, malaa tangada dela e helehelekai nia helekai henua gee, la gii noho hua dee muu, gii bida helekai hua ang gi deia mo ang gi God.

<sup>29</sup> Nia daangada dogolua be dogodolu i digau ala ne kae nadau helekai kokohp mai baahi o God, la gii hai nadau agoago, gei digau ala i golo gi hagadina ina be digaula ne helekai bolo aha.

<sup>30</sup> Maa tangada e noho i lodo di hale daumaha, guu kae nia helekai mai baahi o God, gei tangada dela e agoago la gii lawa, gii noho dee muu.

<sup>31</sup> Goodou huogodoo e mee di hagadele nia helekai a God, hagadau dagidahi, bolo huogodoo gii donu ginai gii kae nadau hagamaamaa.

<sup>32</sup> Di wanga dehuia o di hagadele nia helekai a God le e huwahuwa go tangada dela e agoago nia maa.

<sup>33</sup> Idimaa, God la hagalee hiihai gidaadou gii noho ilodo di hinihini, gei gii noho hagadau buni mo i di aumaalia.

I lodo nia nohongo dabu huogodoo o nia dama a God,

<sup>34</sup> nia ahina gii noho deemuu i lodo nia miiting

dagabuli o nia nohongo dabu. Digaula hagalee dumaalia ginai gi helekai, gii hai be nnaganoho o digau o Jew bolo digaula hagalee dagi.

<sup>35</sup> Maa digaula e hiihai gi iloo, gi heeu ina gi nadau lodo idi hale, idimaa, e hagalangaadia go di ahina ma ga helekai ilodo tagabuli di nohongo dabu.

<sup>36</sup> Nia helekai a God la ne daamada mai i godou baahi, be ne gowadu hua gi goodou?

<sup>37</sup> Maa iai tangada gu hagamaanadu bolo ia tangada kae hegau ni God, be tangada gu kae di wanga dehuia o di Hagataalunga Dabu, mee gii donu ginai bolo nia mee ala guulawa dagu hihi adu gi goodou, la nia haganoho ni Tagi.

<sup>38</sup> Maa mee ga haga de iloo ia nia helekai aanei, goodou haga de iloo ina a mee.

<sup>39</sup> Ogu duaahina nei, goodou gi haga dahidamee ina, hagadele ina nia helekai kokohp a God, gei goodou hudee bule ina nia helehelekai henua gee.

<sup>40</sup> Nia mee huogodoo e hai giilawa idi ala e tau anga, gei e haga noho gi humalia.

## 15

### *Di mouli aga o Christ*

<sup>1</sup> Ogu duaahina nei, au e hagalangahia adu di Longo Humalia dela ne agoago ko au adu gi goodou, gu kae go goodou, gu hagamaaloo aga godou hagadonu.

<sup>2</sup> Di Longo Humalia le e haga dagaloaha goodou maa goodou ga daudali hua agu agoago. Maa

goodou ga hagalee daudali, gei godou hagadonu le e balumee.

<sup>3</sup> Au ne hagadae adu gi goodou di mee hagalabagau dela guu lawa dagu kae, bolo Christ ne made i tadau huaidu gii hai be nnelekai di Beebaa Dabu.\*

<sup>4</sup> Mee ne danu, ga hagamouli aga inia laangi e dolu nomuli gii hai be nnelekai di Beebaa Dabu.\*

<sup>5</sup> Gei Mee ne haga gida gi Peter, nomuli gi ana dama agoago dilongoholu maa lua,\*

<sup>6</sup> nomuli, gi ana dama ne hagadonu eia e limalau duumaa i tolongo hua edahi, baahi dogologo e mouli hua igolo, gei hunu gau guu mmade.

<sup>7</sup> Nomuli ga haga gida gi James, nomuli, gi digau agoago hagu huogodoo.

<sup>8</sup> Haga odi gi muli, Mee ne haga gida mai gi di au, gei au guu hai gadoo be di tama ne haanau i di madagoaa hai gee.\*

<sup>9</sup> Idimaa, au go di mugi lala loo o nia daangada agoago hagu huogodoo. Au e dee tau bolo au e haga ingoo bolo tangada agoago hagu, idimaa, au nogo hagu huaidu di nohongo dabu a God.\*

<sup>10</sup> Go tumaalia o God dela ne hai au gii hai tangada agoago hagu, gei dono dumaalia deenei la hagalee balumee mai gi di au, idimaa, au guungalua damanaiee laa hongo digaula huogodoo, gei hagalee ne hai ko au, go tumaalia o God dela i dogu baahi.

---

\* **15.3:** Isaiah 53.5-12      \* **15.4:** Pisalem 16.8-10; Matthew 12.40; Acts 2.24-32      \* **15.5:** Matthew 28.16-17; Mark 16.14; Luke 24.34,36; John 20.19      \* **15.8:** Acts 9.3-6      \* **15.9:** Acts 8.3

11 Deelaa laa, ma ko au be go digaula, gei aanei madau agoago adu gi goodou ala guu lawa di godou hagadonu.

*Tadau haga mouli aga*

12 Di hai o Christ, dela ne haga mouli aga mai i di made, deenei di haga honu o madau agoago, malaa e aha hunu goodou e helekai bolo digau mmade le hagalee haga mouli aga?

13 Maa nei bolo di mouli aga mai i di made ai, malaa Christ la digi haga mouli aga!

14 Maa nei bolo Christ la digi mouli aga, gei madau agoago le e balumee hua, gei godou hagadonu la nia hagadonu hua balumee.

15 Nia daangada gagidee bolo gimaadou digau e agoago tilikai i God, idimaa, gimaadou la gu hagadele bolo God gu haga mouli aga a Christ. Maa nei bolo edonu digau mmade le deemee di haga mouli aga, malaa, Mee digi haga mouli aga a Christ.

16 Maa digau mmade le e deemee di haga mouli aga, malaa Christ la digi haga mouli aga.

17 Maa Christ la digi haga mouli aga, malaa godou hagadonu le e balumee hua, gei goodou e noho hua i lodo godou huaidu.

18 Digau hagadonu hogi ala ne mmade ilodo nadau hagadonu, la gu balumee hua.

19 Maa nei bolo tadau hagadagadagee gi Christ la anga hua gidi mouli henuailala, malaa, nia daangada huogodoo henuailala e tau di mmada hagaaloho mai gi gidaadou.

<sup>20</sup> Gei di tonu, Christ la gu haga mouli aga i di made, guu hai di hagamagedagee ni digau ala guu mmade bolo ginaadou e haga mouli aga la-belaa.

<sup>21</sup> Di made ne hidi mai i baahi tangada, i di ala la hua, di mouli aga mai di made la ne hidi mai i baahi tangada.

<sup>22</sup> Nia daangada huogodoo e mmade i di hai a Adam, go di ala la hua nia daangada huogodoo e hai gi haga mouli aga i di hai a Christ.

<sup>23</sup> Gei nia daangada ga haga mouli aga be di hagatau dela guulawa di haganoho: Christ matagidagi; nomuli go nia dama a Maa i dono madagoaa ga hanimo ai.

<sup>24</sup> Nomuli go di hagaodi, i di madagoaa a Christ gaa wanga Teenua King gi God Tamana i muli dana daaligi gi daha nia dagi hagataalunga huogodoo, nia mogobuna dagi, mo nia mahi.

<sup>25</sup> Gei Christ gaa dagi gaa daeloo gi God gaa dugu ono hagadaumee huogodoo gi lala ono babaawae.\*

<sup>26</sup> Di hagadaumee dela e hagamagedaa muliagi loo, la go di made.

<sup>27</sup> Di Beebaa Dabu e helekai,  
“God e dugu nia mee huogodoo  
gi lala ono babaawae.”

Ma e modongoohia bolo “nia mee huogodoo,” la hagalee helekai bolo God e dau eia, dela ne dugu nia mee huogodoo gi lala nia babaawae o Christ.\*

<sup>28</sup> Di madagoaa nia mee huogodoo maga dugu gilala di mogobuna o Christ, gei Tama

---

\* 15.25: Pisalem 110.1      \* 15.27: Pisalem 8.6

gaa dugu eia gi lala o God, dela ne wanga gi dana Dama di mogobuna e dagi nia mee huogodoo. Nomuli gei God gaadagi nia mee huogodoo hagatau.

<sup>29</sup> Dehee di hai o digau ala e babbais ang gi digau ala guu mmade? Ma di aha dela ne hagamaanadu go digaula belee hagagila? Maa gaa donu bolo digau mmade la hagalee haga mouli aga, malaa eaha nia daangada e babbais ang gi digau mmade?

<sup>30</sup> Gei gimaadou le eaha ala ewanga madau mouli gi di haingadaa i nia aawaa huogodoo?

<sup>31</sup> Ogu duaahina nei, au e mmada gi di made i nia laangi huogodoo. Au e helekai beinei i dogu hagalaamua goodou i tadau mouli hagadaubuni ang gi Jesus Christ, tadau Dagi.

<sup>32</sup> Maa au ne heebagi innadinga dangada gi nia manu hagamadagudagu dangada ikinei ilodo Ephesus, ma di wiiniaha nekae koau? Maa edonu bolo digau mmade le hagalee haga mouli aga, malaa gidaadou gii hai hua be di agoago dela e hai boloo:

“Gidaadou gi miami hua mo di inuinu.

Idimaa, daiaa, gei gidaadou gaa mmade.”\*

<sup>33</sup> Gii pula i digau halahalau dangada! Idimaa, di hai hoo ang gi digau huaidu, le e hagahuaidu nia hangaahai humalia.

<sup>34</sup> Goodou heia nia mee ala e donu, gii lawa gi daha mo godou haihai hala, idimaa, hunu goodou digi iloo a God. Au e hagi adu gi goodou nia mee aanei bolo gi langaadia ai goodou.

---

\* **15.32:** Isaiah 22.13

*Tuaidina dela ma ga mouli aga*

<sup>35</sup> Tangada ga heeu: Digau ala guu mmade le e hagamouli aga behee? Nia huaidina behee ala ga mouli aga ai digaula?

<sup>36</sup> Goe tangada dadaulia! Goe e de iloo bolo dau lii dela gaa dogi gi lodo di gelegele, la hagalee tomo aga maa di lii deela la digi made i mua?

<sup>37</sup> Di mee dela e dogi kooe gi lodo di gelegele, la hagalee go tuaidina o di laagau, go di lii la hua dela gaa tomo gaa hai di laagau 'wheat', be tuai laagau.

<sup>38</sup> Go God hua dela e dugu anga gi nia laagau gii tomo gii hai be dono hiihai. Gei e dugu ang gi di lii nei mo di lii nei tuaidina donu di lii.

<sup>39</sup> Nia goneiga onia huaidina huogodoo la hagalee hai be di mee e dahi: nia daangada, nia manu, nia manu mamaangi, mo nia iga e hai geegee nadau goneiga.

<sup>40</sup> Nia hagadilinga huaidina labelaa i golo: Nia huaidina di langi mo nia huaidina henuailala. Nia madamada o nia huaidina di langi le e hai gee mo nia madamada o nia huaidina henuailala.

<sup>41</sup> Di laa, di malama, mo nia heduu e hai geegee nadau madamada. Gei mehanga nia heduu nadau madamada e hai geegee.

<sup>42</sup> Deenei di hai digau mmade ma ga haga mouli aga. Tuaidina tangada ma gaa danu, le e mooho gi daha. Ma ga hagamouli aga, le hagalee mooho.

<sup>43</sup> Dono danu, geia gu huaidu, gu bagege. Dono mouli aga, geia gu madamada huoloo, gu maaloo dangihi.

<sup>44</sup> Dono danu, geia tuaidina dangada. Dono mouli aga, geia guu hai tuaidina hagataalunga. Maa tuaidina henuailala i golo, malaa, tuaidina hagataalunga i golo.

<sup>45</sup> Di Beebaa Dabu guu lawa di hihi boloo, “Taane matagidagi la go Adam guu hai tangada mouli.”

Gei Adam muliagi e gaamai di hagataalunga hag-amouli. \*

<sup>46</sup> Hagalee go tuaidina hagataalunga ne hai i mua, go tuaidina gelegele, ga nomuli la go tuaidina hagataalunga.

<sup>47</sup> Adam matagidagi la ne hai gi nia gelegele o henuailala gei togolua Adam ne haneia i di langi.

<sup>48</sup> Digau henuailala e hai be tangada ne hai gi nia gelegele. Digau mai di langi e hai be Mee dela ne haneia i di langi.

<sup>49</sup> Maa gidaadou gaa dina gi tangada dela ne hai gi nia gelegele, gei gidaadou hogi e dina labelaa gi Mee dela mai i di langi.

<sup>50</sup> Ogu duaahina nei, dagu mee dela e helekai iei au, bolo tuaidina goneiga mono dodo, le e deemee di hai mee gi Teenua King o God. Nia mee hogi ala e mmade, le e deemee di hai mee gi di mouli dee odi.

<sup>51-52</sup> Au e hagi adu di mee dela e donu, e de iloo nia daangada: Gidaadou huogodoo hagalee mmade, gidaadou huogodoo le ehuli tadau huaidina hagalimalima gadoo bedi gemu odi golomada, i di madagoaa di buu haga muliagina ma ga iliili. Di madagoaa di buu ma ga ili, gei digau ala ne mmade ga haga mouli aga ga deemee

---

\* **15.45:** Genesis 2.7



di mmade labelaa, gei gidaadou huogodoo gaa huli.\*

<sup>53</sup> Idimaa, nia mee ala e mooho, le e hai gii huli, gaa hai nia mee hagalee mooho, gei nia mee ala e mmade, le e hai gii huli, gaa hai nia mee ala e mouli hua beelaa.

<sup>54</sup> Di madagoaa o di hai deenei ga gila aga, gei nia mee ala e mee di mmade la gaa huli ga deemee di mmade, malaa, nnelekai di Beebaa Dabu gaa donu,

“Di made gu daaligi gi daha, di aali guu dohu dogomaalia!”\*

<sup>55</sup> Di made, dehee doo aali?

Di made, dehee do mogobuna haga mmae dangada?”\*

<sup>56</sup> Di mogobuna o di made e hidi mai i di huaidu, gei di mogobuna o di huaidu e hidi mai i nnaganoho.

<sup>57</sup> Di mee bolo God i dana hai gidaadou gi aali mai i tadau Dagi go Jesus Christ.

<sup>58</sup> Deenei laa, ogu duaahina hagaaloho nei, tuu maaloo, hudee maliuliu. Dugu anga goodou i nia madagoaa huogodoo ang gi nnegau a Tagi, i goodou e iloo godou hegau ala e hai ang gi Tagi, la hagalee balumee.

## 16

*Tigidaumaha hagamaamaa ang gi digau ha-gadonu*

---

\* **15.51-52:** 1-Thessalonians 4.15-17

\* **15.54:** Isaiah 25.8

\* **15.55:** Hosea 13.14

<sup>1</sup> Dolomeenei gei au e helekai i di bahihadu dela ne hagabudu belee hagamaamaa nia dama a God ala i Judea: Goodou e hai gii hai dagu mee ne haganoho ang gi nia nohongo dabu ala i Galatia gi heia.\*

<sup>2</sup> Nia laangitabu huogodoo, tangada nei mo tangada nei i goodou gi dugu gi daha dana bahihadu, e hagabau gidi baahi o ana bahihadu ala e kumi, benabena ina, gi de haga budu labelaa godou bahihadu i dogu madagoaa ma gaa dau adu gi godou baahi.

<sup>3</sup> Imuli hua dogu dau adu, gei au gaa wanga nia lede hagamodongoohia gi godou gau ala ne hagamogobuna belee kae di godou wanga dehuia gi digau o Jerusalem.

<sup>4</sup> Maa ga humalia go dogu hana, gei digaula gaa hula madalia au.

### *Nia hagataele a Paul*

<sup>5</sup> Au ga gila adu i muli dogu hana laa lodo Macedonia, idimaa, au e hai gii hana laa lodo Macedonia.\*

<sup>6</sup> Holongo au gaa noho i godou baahi, holongo di madagoaa magalillili dogomaalia. Gei goodou e mee di hagamaamaa au, gii mee dagu hana gi nia gowaa ala belee hana ginai au.

<sup>7</sup> Au e hiihai bolo dogu heetugi adu gi mada duai i dogu madagoaa ma ga hanadu laalaa. Tagi gi dumaalia mai gii noho au duai i godou baahi.

<sup>8</sup> Gei au gaa noho hua i Ephesus gaa dae loo gi di laangi Pentekos.\*

---

\* **16.1:** Romans 15.25-26    \* **16.5:** Acts 19.21    \* **16.8:** Leviticus 23.15-21; Deuteronomy 16.9-11

<sup>9</sup> Au guu gida dagu madagoaa humalia e hai agu hegau i ginei, gei e humalia huoloo, ma e aha maa digau hagadaumee le e dogologo.\*

<sup>10</sup> Maa Timothy gaa dau adu gi godou baahi, gei goodou gi hagaahi ange a mee, gii noho a mee manawa lamalia i godou baahi, idimaa, mee tangada e hai nia hegau a Tagi Jesus gadoo be au.\*

<sup>11</sup> Goodou hudee haga balumee, gi hagamaamaa ina a mee, gi hanimoi labelaa a mee ilodo di aumaalia, gi idau i dogu baahi, idimaa, au e noho ge etalitali a mee mo nia duaahina hagadonu labelaa ala igolo.

<sup>12</sup> Gei tadau duaahina go Apollos: Au gu helehelekai hagamahi gi mee gi hanadu madalia tadau duaahina hagadonu dama a Christ ala igolo. Mee digi baba dolomeenei. Hila hua mee gu iai dono madagoaa igolo, gei mee ga hanadu.

### *Nia helekai hagaodi*

<sup>13</sup> Goodou gii noho kanakana, tuu maaloo i lodo godou hagadonu. Gi haga mataane gi maaloo.

<sup>14</sup> Godou hegau huogodoo gi heia i di aloho.

<sup>15</sup> Goodou gu iloo humalia a Stephanas mo dono beneinei. Digaula ne huli nadau lodo i di matagidagi i Achaia gaa dugu anga ginaadou gi nnegau o nia daangada a God. Au e dangi adu gi goodou, ugu ihoo hagaaloho,\*

<sup>16</sup> bolo goodou gi daudalia nia hangaahai dagi beenei, mo digau huogodoo ala guu buni gi digau aanei ala e hai nadau hegau ang gi God.

\* **16.9:** Acts 19.8-10  
1-Corinthians 1.16

\* **16.10:** 1-Corinthians 4.17

\* **16.15:**

<sup>17</sup> Au e tene gi Stephanas, Fortunatus mo Achaicus ala nellomoi. Digaula e pono goodou ala hagalee i ginei.

<sup>18</sup> Digaula gu haga manawa lamalia au, e hai gadoo be di nadau haga manawa lamalia goodou. Hagalaamua ina nia daane ala e hai beenei.

<sup>19</sup> Nia nohongo dabu ala i Asia e hai di nadau hagaaloho adu gi goodou. Aquila, Priscilla mo digau ala e dagadagabuli ge e dadaumaha i di hale meemaa, e hai di nadau hagaaloho gi goodou i di ingoo o Tagi.\*

<sup>20</sup> Tadau duaahina huogodoo ala e noho i ginei, e hai di nadau hagaaloho adu gi goodou.

Goodou gi hagadau hagaaloho i godou mehanga gi di hagaaloho o nia dama a Christ.

<sup>21</sup> Au e hihi di mee deenei gi dogu lima donu: *Nia hagaaloho mai Paul.*

<sup>22</sup> Tangada dela ma ga hagalee e aloho i Tagi, le e halauwa.

*Maranatha* – Tadau Dagi gi hanimoi!

<sup>23</sup> Tumaalia o tadau Dagi go Jesus gi madalia goodou.

<sup>24</sup> Dogu aloho gi madalia goodou huogodoo, i di ingoo o Jesus Christ.

---

\* **16.19:** Acts 18.2

**Beebaa Dabu**  
**The Holy Bible in the Kapingamarangi language of the**  
**Federated States of Micronesia, spoken on the**  
**Kapingamarangi and Ponape islands, Caroline Islands**

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

---

PDF generated using Haiola and XeLaTeX on 18 Apr 2025 from source files dated 31 Aug 2023

28201f3a-53b9-559a-9b49-00a6f40bcb2a